

:تمام كدة. فيه حاجة تانية؟

قال عبدالرؤف رجل الأعمال الشهير جملته وهو يوقع باسمه على أحد الأوراق أمامه على الطاولة التي كان يتصدرها . فنظر له هذا الشاب الذي يجلس على يساره بنظرة اهتمام قلقة وهو يأخذ منه الملف و يقول له :لا. كفاية كدة النهاردة . انا شايف انك تعبت . ما كنش لازم أصلا انك تنزل الشغل دلوقت خصوصا ان الدكتور قال انك محتاج لراحة تامة . فأجابته عبد الرؤف هذا الكهل الذي قد بلغ من العمر ما يناهز الستين عاما وقد بدا عليه الارهاق: لو كنت هسمع كلام الدكتورة هفضل الفترة اللي باقية من عمري راقد ع السرير مش بتحرك ودة اللي مش هقدر استحمله. 3

فسأله الشاب وهو يحيط بأصابعه القويه كف عبد الرؤف المستند على الطاولة: فكرت في موضوع العملية ولا لسة؟ 1

فتنهده عبدالرؤف في غير ارتياح وكأنه لا يستسيغ الخوض في هذا الحديث ثم قال بصوت ساخر: العملية اللي اصلا مش مضمونة؟ وكمان لو نجحت هتزد في عمري كام يوم؟ يا يوسف يابني انا خلاص بقول ياللا حسن الختام .

تجرت نظرات يوسف وهو ينظر اليه بلوم شديد وكأنه يستنكر فكرة فقدانه لهذا الرجل الذي طالما اعتبره بديلا عن والده المتوفي وهو لم يتعد التاسعة من عمره بعد . ولذا فمنذ معرفته بعبد الرؤف الكامل التي استمرت لعشر سنوات حتى الآن تعدت علاقته به من الشراكة الى الصداقة بل انه في بعض الاوقات كان يشعر أن هذا الرجل بمثابة الأب الثاني له لذا قال له بلهجة قاسية بها بعض التهديد:اسمع. الكلام دة اياك اسمعه منك تاني. والعملية هتعمل برضاك أو غصب عنك حتى لو اضطريت اني اجرجرك لاوضة العمليات بنفسي مادام فيه امل .

علم عبد الرؤف من نظرة شريكه الشاب أنه ينوي ذلك فعلا ان اضطر اليه لذا قال له ممازحا: ايه يا يوسف؟ قلبت كدة جد مرة واحدة يعني ؟ ما تخافش ياسيدي هعمل العملية بس لما اطمئن الاول على مستقبل مريم !

نظرة يوسف الحائرة جعلته يستمر في التوضيح: مريم حفيدتي. انت عارف بعد وفاة والدها انا بقيت المسنول عنها وخصوصا بعد ما رجعت مصر. فانا لو عملت العملية دلوقت مش هتلاقي حد يقف معاها بعدي وهية مش هتقدر تعيش لوحدها في مجتمع كل اللي تعرفه عنه انها اخدت جنسيته .

فقال يوسف بنبرة حاقدة: أبوها كان لازم يعمل حساب لكل دة. ازاي عمره ما فكر ان هيبجي اليوم اللي ممكن يسببها فيه لوحدها في بلد غريبة بعيدة عن أهله وأهلها اللي هما أحق الناس بتربيتها ورعايتها؟

فسأله عبد الرؤف بنظرة مترقبة : انت لسة مش قادر تسامحه يا يوسف؟

وعندما لم يتلق جوابا قال له برجاء: سامحه يا يوسف ع الاقل اكراما ليا

لم يتمالك يوسف نفسه الى ان ابتسم لصديقه ابتسامة دافئة وهو يقول: تفكر اني هقدر اكره انسان ميت؟! !

لا مفر

:مستحيل! انا مش موافقة .

خرجت كلمات الاحتجاج كالرعد من فم مريم فور ان اخبرها جدها بقراره لتزويجها من شريكه يوسف جلال ,ومع ذلك بدا صوته هادئا وهو يسألها: وايه السبب؟ 1

تفاجأت مريم من سؤاله أو بالأصح لم تتوقع منه ان يسأل مثل هذا السؤال وهو بالتأكيد يعلم جوابه ومع ذلك قررت أن تجيب عليه ولم يكن قد هدأ انفعالها بعد: ازاي يا جدي عاوزني اوافق اني اتجوز واحد معرفوش وكمان عمره اد عمري مرتين؟ ليه ياجدي عاوز تعمل فيا كدة؟

لم يرد عبدالرءوف على الفور بل تأمل في ملامحها قليلا فهي ماكانت تشبه والدها باي شكل من الاشكال فلامحها بدت اوروبية بشكل أكثر من واضح بوجهها الدائري الصغير وبشرتها البيضاء الشاحبة وعينيها الواسعتين بلون العشب الأخضر وشعرها الأحمر الناري مما كان سيجعله يشك في حقيقة نسبها اليه الا ان قلبه كان على يقين بأن الدماء التي تجري في عروق تلك الشابة الفاتنة هي نفسها الدماء التي تجري في عروقه علاوة على تلك الصور التي كان يرسلها لها ابنه بصورة مستمرة في ذكرى ميلادها كل عام وهو يقف بجانبها, كما أنها قد ورثت عن والدها طبعه وعناده. قطع عبدالرءوف الصمت ليقول بلهجة قوية تحمل الكثير من التهديد: مريم! انتي لما بعيتلي عشان تيجي تقعدي معايا في مصر كنتي واثقة ان انا اكثر واحد هكون خايف عليكى وعلى مستقبلك عشان كدة لازم نتقي في قراراتي كويس أوي. يعني لما اقولك ان يوسف هوة انسب واحد ليكي وهو الوحيد اللي هيقدر ياخذ باله منك ومن مصالحك بيقا انا صح ولازم كلامي يتنفذ .

تسلل الاحباط بداخل مريم وقد بدأت تياس من ان جدها سيهتم كثيرا باعتراضاتها: طيب يا جدو انا لسة صغيرة وكمان لسة قدامي اربع سنين كلية . غير اصلا ان الحياة هنا لسة غريبة عليا شويه. فما بالك بقا بالجواز من شخص غريب معرفوش وكمان من مجتمع غريب نسبيا بالنسبالي؟

عبدالرءوف : كل دة هيتحل . المهم دلوقت انه على وصول عشان يقابلك وتتعرفوا على بعض

ثم اشار باصبعه باتجاهها محذرا: مريم ! اياكي تصغريني اذامه 1

مريم باستسلام: حاضر يا جدو

وهم عبدالرءوف بالذهاب وقد بدا عليه الارهاق من حدة النقاش:ياللا. اسبيك انا بقا عشان تغيري هدموك. ذهب عبد الرءوف تاركا مريم وهي تتخبط بين أفكارها فمن ناحية لا تريد ان تعصي جدها وخاصة وهي تعلم مدى خطورة حالته الصحية فهو الان بالنسبة لها قريبا الوحيد الذي يمكنها الاعتماد عليه, ومن ناحية اخرى لا تريد الزواج الان وخاصة من ذلك الشخص فهو اكبر منها بكثير كما انها لاتعلم عنه الا انه شريك جدها. وفجأة خطرت لها فكرة .فماذا ان لم يكن هذا الشخص هو ايضا لا يوافق على تلك الزيجة؟ ولكنها استبعدت ذلك الاحتمال سريعا لانه ان كان كذلك فلا يوجد ما يجبره عليها فهو رجل اعمال مرموق في سن تسمح له باتخاذ قراراته بنفسه بعقلانية. ولكن ظل الامل بداخلها من انها يمكنها ان تقنع هذا الرجل بالتخلي عن فكرة الزواج بها وبذلك سيأتي الرفض من ناحيته دون ان تغضب جدها. وقد عازمت الامر على ذلك .

الوعيد

دخل يوسف فيلته وهو في قمة الانسجام أحيانا يصفر وأحيانا يندن بأغنية مبهجة. وكان المكان يسوده الظلام والهدوء وكان لا أحد يسكنه ,توجه يوسف مباشرة ناحية السلم ولكن استوقفه صوت خشن ساخر: ما بدري يا سعادة البيه. وشرفت دلوقت ليه؟ ما كنت تبات في المكان اللي كنت فيه أحسن .

ارتسمت الابتسامة على وجه يوسف من محاولة وليد أخيه لتقليد صوت الزوجة الغاضبة فاستدار وتوجه ناحية مفتاح الاضاءة لينير المكان ويجد أخيه جالسا بارتياح على أحد الكراسي وكان يرتدي بيجاما للنوم وأكمل مستمرا في تقليد صوت الانثى رغم خشونة صوته الواضح: فكر براحتك ودور على حجة كويسة يمكن أصدقك .

فقهقه يوسف وقال له بصوت مرح: انت مفيش فايذة فيك أبدا. دة انت لو كنت مراتي بجد كنت طلقتك بالتلاتة وتسعين. 3

فوقف وليد وكان فرق الطول بينه وبين أخيه لا يذكر تقريبا ولكنه أكثر نحافة وبجسم رياضي أيضا يشبه يوسف بشدة ولكن ملامحه أقل قسوة وهو يقول بصوته الطبيعي : ياعم روح كدة ,انت مين اصلا ممكن توافق ترتبط بيك وانت كل يوم تبات في حضن واحدة شكل؟ 2

فرد عليه يوسف بلهجة ساخرة: ياعم كفاية واحد بس في العيلة عايش زي الناسك, تصدق اني بدأت أخاف عليك وأشك انك

فقاطعه وليد بحسم: عننذك. انت عارف كويس ان اخوك راجل. بس مش لازم أثبت رجولتي بطريقتك ياعم كزانوفا

يوسف ممازحا:ع الاقل أشوفك مع بنوثة حلوة كدة ماشيين ع الكورنيش وانت ايدك في ايدها

وليد: هيصصل بس في الحلال يا كبير

يوسف متفاجنا :يعني ايه يالا؟انت اتجوزت من ورايا ولا ايه؟

وليد:ياعم يوسف بقولك لسة هيصصل بس لما اجوز اخوية الكبير الاول اللي شكله كدة ناوي يعنس ويقعدني جنبه انا كمان

فقال يوسف بجدية وهو يجلس على الاريكة التي كانت خلفه: اطمن يا سيدي. تقدر من بكرة تدور على بنت الحلال. انا خلاص خطبت

بدا وليد غير مستوعبا لما قاله يوسف فجلس بجواره وسأله بلهفة: انت بتتكلم بجد؟ و هية مين بقا تعيسة الحظ واللي امها داعية عليها دي؟ 1

يوسف:حفيدة عبدالرءوف الكامل

هتف وليد: مريم؟ !

يوسف باهتمام:انت تعرفها؟

وليد:لا .سمعت عنها من ماهر .

يوسف باستهزاء:وسي ماهر دة بقا قال ايه؟

وليد:مش كتير. اللي قدرت أفهمه منه انه تقريبا كان راسم عليها لانه كان فاكرها واحدة اوروبية ومدلعة وماشية على حل شعرها .لكن بعد كدة ومن طريقة كلامه حسيت انه يا إما اتصدم يا إما انها صدته جامد

يوسف باشمئزاز:أنا مش عارف انت مصاحب البني ادم دة ازاي؟

وليد: يا عم يوسف صحوبية ايه؟ وهوة ماهر بتاع الكلام دة بردو؟ الموضوع بس اني بساير اموري معاه عشان الشغل .انت عارف ان شخص زي دة مش سهل لا هوة ولا ابوه ولازم اللي يتعامل معاهم تكون عنيه في وسط راسه .

من الرابع؟

وقفت مريم أمام جدها في حجرة مكتبه وهي تشتغل غضبا بينما كان عبد الرءوف يجلس خلف المكتب في هدوء تام كعادته معها ليمتنص غضبها وسألها: ممكن أعرف انتي ليه زعلانة دلوقت؟

مريم: يعني المفروض اني مش ازعل لما اعرف ان حضرتك ادبت رقمي لحد غريب؟

عبدالرءوف: اولاً لازم تعرفي ان لو انا كنت رفضت ادي رقمك ليوسف كان هيعرف يلاقي اكثر من طريقة تانية يجيب بيها رقمك..ثانيا يوسف ما يقاش حد غريب خلاص . دة بقا خطيبك وكلها اسبوع ويبقا جوزك .

مريم مصدومة: ايه؟! اسبوع؟! ايه الكلام اللي بتقولو دة يا جدو؟! يعني ايه؟مش فاهمة .

عبدالرءوف بنفس الهدوء: مانتى لو كنتي تهدي شوية كنت هقدر اقولك وافهمك كل حاجة .ممكن تقعدى بقا؟

جلست مريم امامه بجمود وقد هربت الدماء من وجهها فبدأ عبدالرءوف الحديث: يوسف جالي المكتب النهاردة عشان يحدد معايا كل حاجة عشان يبقا الموضوع رسمي وبشكل سريع. وانا كان من رأيي اننا نعمل الشبكة يوم الخميس الجاي ,لكن يوسف اقترح عليا انها تكون شبكة و كتب كتاب عشان يكون على حريته شوية في تعامله معاكي. وتقدرنا تخرجوا مع بعض زي مانتو عاوزين, لانه حس انك ممكن ترفضى حاجة زي كدة لو كان اللي بينكم مجرد خطوبة ويس

مريم بتذمر: بس يا جدو دة ما ينفعش؟ احنا لسة ما نعرفش بعض كويس. فمش معقول ابدا اننا نتجوز كدة بسرعة. وكمان اسبوع دة قليل اوي مش هعرف اجهز فيه اي حاجة .

عبدالرءوف: انتو قدامكم شهرين قبل الجواز تقدرؤا تتعرفؤا فيهم على بعض لحد ما تخلص السنة الدراسية وتخلصي امتحاناتك. وبعدين انتي مش هتشيلى هم اى حاجة لان يوسف هؤة اللي هيجهز لكاتب الكتاب واسبوع مش كتير عليه هو يقدر يعمله بكرة وبكل اللي انتي تطليه بس لو احنا موافقين .

بدا عليها قلة الحيلة وهي تقول : طب يا جدو ع الاقل كنتم تاخذوا رأيي .

عبدالرءوف بنظرات ثقابة: وهو كان عاوز يتصل بيكي عشان يبلغك بنفسه وياخد رأيك لكن انتي اتسرعتي وقفلتي السكة في وشه مش هؤة دة اللي حصل بردو؟؟

وقبل ان تجد مريم ما ترد به على جدها أشار لها بيده واستطرد قائلا: عشان كدة تجنبا من ان الموقف دة يتكرر معاه تاني أصر على ان كتب الكتاب يكون مع الشبكة وفي اسرع وقت .

مريم وقد اوشكت على البكاء: بس يا جدو انا مش موافقة .

عبدالرءوه بنظرات لائمة اكثر من ان تكون غاضبة: وعاوزة تكسري كلمتي زي ما عمل ابوكي قبل كدة؟ بس المرادي بقا يا مريم انا مش هقدر استحمل واحتمال كلمة زي دي تقضي عليا بجد

فقامت مريم سريعا وقبلت يد جدها والدموع تملأ عينيها: بعد الشر عليك يا جدو. دة انا مليش حد غيرك .

فمس عبدالرءوف على رأسها بحنان: عشان كدة يابنتي انا مش عاوز أسيبك تتبهدي من بعدي. ويوسف هو الشخص الوحيد اللي هبقا مطمئن عليكى وانتى معاه

صاحب الكلمة الأخيرة

وقفت مريم مع صديقتها حياة على درجات السلم المؤدية الى كلية الاعلام فقالت حياة بانفعال وغيظ شديد: معقولة يا مريم؟! انتى اتجننتى؟! ازاى تعملى كدة؟

مريم بضيق: ماهو البني ادم اللي اسمه ماهر دة استفننى وكمان كدة كدة جدو ما كنش هيوافق على اى اعتراض .

حياة: يعنى انتى بقيتى مقتنعة بجوازك من يوسف جلال؟

مريم: مقتنعة؟! دة انتى لو سألتينى مين هو اكثر انسان بكرهه في الدنيا كلها هقولك يوسف جلال

حياة: ومع ذلك هتجوزيه الخميس الجاي. يا فرحتى! از غرط! 7

مريم: بالله عليكى يا مريم انا مش ناقصة. يا تقولى كلمة عدلة يا تسكتى احسن

شعرت حياة بمحنة صديقتها فسألته بجدية: طيب انتى جهزتى كل حاجة؟

مريم بسخرية مريرة: اجهز ايه؟ ماهو سى يوسف هيقوم بالواجب انا كل اللي مطلوب منى انى اختار الفستان اللي هحضر بيه

حياة: طيب المفروض اننا نحضر ولا لا؟

مريم: انا مش عاوزة حد يحضر غيرك يا حياة. انا بجد هبقا محتاجالك في اليوم دة. وفي نفس الوقت مش عاوزة ابقا فرجة لحد. انتى عارفة بقا جواز حفيدة عبدالرءوف الكامل من رجل الاعمال يوسف جلال اكيد مش هيعدي بالساهل. وانا مش عاوزة العيون تكون مسلطة عليا كفاية التوتر اللي هبقا فيه .

فامسكت حياة بيدها مطمئنة: ولا يهملك يا مريم. تفاعلى خير. وان شاء الله كله هيبقا تمام .

:السلام عليكم. بتتوشوشوا في ايه؟

كان ذلك الصوت الضاحك لثلاثة من صديقات مريم و حياة التي اسعفت صديقتهما وتجاهلت السؤال وهي تقول مازحة: بسم الله الرحمن الرحيم. سلام قولا من رب رحيم. ودول يبطلعوا الساعة كام؟

فقالت واحدة من الثلاثة: مالك يا اوختي؟ دة ولا كانك شفتي عفريت قدامك

حياة: وانتى بتقولي فيها يا سلمى . دة لو عفريت مش هيخضنا بالشكل دة؟

سلمى: طب يا ختي ما تبقاش تنسي تبخري

حياة: وهو انت فيه بخور هيقدر يصرفكم؟ دة انتو محتاجين ونش يشيلكم انتو الثلاثة ويوديكم بلاد تتركب الافيال

فقالت فتاة اخرى واسمها هالة بهيام وهي تتلمس الدبلة التي في اصبعها باليد اليمنى: وابعد عن ميدو حبيبي؟ دة كان بعد الشر يموت فيها

فقالت الثالثة بمداعبة: ياختي دة ما هيصدق انه يخلص من الشبكة السوداء دي

هالة: بقا كدة يا نورا . طب يارب يارب يارب تتخطبوا كلكم كدة في يوم واحد وافرح فيكم واطلع كل اللي بتعملوه فيا دة على عنيكم

سلمى: تعرفي يا بت ياهالة مش انتى صاحبتى من زمان؟ بس دي اول مرة اسمعك فيها بتدعيلي . يارب ياختي اتخطب بسرعة بقامحدثش عارف المتنيل على عينه شريك حياتي المنتظر دة آخر كدة ليه؟

ملكي

في فيلا كمال وهدان كان ماهر يجلس على احد الكراسي وهو يشتعل غضبا ,وعندما سمع صوت أقدام والديه وهما ينزلان درجات السلم , هب واقفا و استدار تجاههما وهو يقول ثائرا: انتو لسة مصرين بردو انكم تروحو؟

فقالت وردة بحنان محاولة تهدئة ابنها: ماننت عارف يابني, انا مش هقدر اكسر لجدك كلمة .

فنظر ماهر الى والده يسأله: وانت كمان يا بابا مش قادر تقول لا؟

كمال وهو يحاول ان يكتم غيظه: ولا انا يا ماهر طالما جدك مازال هو المتحكم في كل شيء

ماهر: يعني هتسيبوا مريم تتجوز يوسف دة وكل حاجة تضيع من ايدينا؟

وردة: يابني مين قالك كدة بس؟ مفيش حاجة هتضيع ان شاء الله. جدك عمره ما بيظلم حد. تفتكر يعني ممكن يظلم بنته؟

كمال بلهجة ساخرة: ومين قالك انه هيبقا حاسس انه بيظلمك, ماهر ممكن يكون فاكر انه بكدة بيعوض اللي اسمها مريم دي عن اللي عمله مع ابوها .

ماهر: وطبعا الزفت اللي اسمه يوسف دة ما هيصدق, اصلا الراجل دة انا عمري ما استريحته. وقريه من جدي دة مش طبيعى خصوصا بعد اللي عمله خالي. مش معقول يكون قرر فجأة كدة انه يتجوز بنت الراجل اللي رفض انه يتجوز عمته زمان وينسى اللي فات. اكيد بيخطط لحاجة تانية .

فقال كمال موافقا على كلام ابنه: معاك حق يا ماهر. وكمان يوسف دة مش من النوع اللي ممكن يسبب تاره بسهولة. عشان كدة احنا لازم نخلي بالنا منه كويس اوي .

ماهر متوعدا: وانا وديني ما هفوتله جوازه من مريم دة على خير. وانا وهو والزمن طويل. 1

اقيم الحفل في فيلا عبدالرءوف الكامل وقد كان حفلا بسيطا كما ارادته مريم لا يضم الا اقرب الاقربين واهمهم بالطبع عبدالرءوف الذي كان وكيل العروس في عقد الزواج وكذلك الشاهدان وهما كمال زوج وردة و وليد اخو يوسف, الى جانب وردة وبعض الاصدقاء القلائل وعلى رأسهم كانت حياة التي لم تترك صديقتها منذ صباح هذا اليوم .

كانت مريم ترتدي الفستان الذي تم اختياره من قبل يوسف فهي لم تجد اي فائدة من الاعتراض وقد غطت شعرها بطرحة ذات لون ذهبي لامع أبرز لون عينيها الأخضر بوضوح. وقد أصرت مريم على الا تستخدم ايا من ادوات الزينة فهي في الحقيقة لم تكن بحاجة اليها, فبدونها وبهذا الفستان الرائع كانت تبدو كالمملكة لحظة التتويج .

اما فيما يتعلق بيوسف فكعادته بدا في قمة الوسامة والرخامة ببذلته السوداء الانيقة التي ابرزت مدى طولها مقارنة بمريم التي وان كانت ترتدي حذاءها ذات الكعب العالي فهي بالكاد تصل الى أعلى رقبته فقط مما جعلها تشعر بسيطرته وتفوقه عليها ولو قليلا

تم الانتهاء من كتابة العقد مع تقديم التهاني للعروسين والدعاء لهما بدوام السعادة, وجاءت اللحظة الحاسمة فجلس يوسف على الأريكة بجوار مريم مما جعلها تبتعد عنه قليلا في ضيق, وقد لاحظ يوسف ذلك ولكنه لم يبال بالامر. وجاء وقت الشبكة فأخرج يوسف من جيبه علبه قטיפية صغيرة الحجم أخذ منها خاتم الخطوبة وكان من الألماس يتوسطه فص صغير من الزمرد الأخضر أختارته مريم ليتناسب مع لون عينيها مد يوسف يده ناحية مريم وهو يقول بصوت هادىء شعرت مريم من خلاله مدى السخرية التي يحملها : ايدك يا عروسة

وما زالت القلوب تنزف

بقا كدة يا مريم؟ وهو احنا مش اخواتك ولا ايه؟ ولا كنا مش هنفرحلك يعني؟ !

كان هذا الصوت اللائم هو صوت هالة الذي بدا عليها الضيق الشديد فقالت لها مريم معتذرة وهما تجلسان حول طاولة مع باقي صديقاتهما: معلش والله كان غصب عني, وكمان احنا عملنا الموضوع دة ع الضيق. ويا ستي حقك عليا المرادي بس ان شاء الله في الفرح اكيد لازم تكونوا موجودين وهوة انا يعني ليا مين غيركم في مصر بعد جدو! ولا انتم بقا مش هنترضا تيجوا؟

هالة : يا خبير! دة احنا نجيبك على رموش عنيانا . ربنا يهنكي يا مريمومة يا رب ويسعدك .

مريم: تسلميلي يا حبيبتي

وهنا قالت سلمى مازحة: بس تعرفي يا بابت يا مريم انتي وقعتي واقفة بصحيح. الواد فعلا مز أوي وشيك وابن ناس ومن ذوات الملايين . اوعدنا يارب بواحد من النوعية دي ان شالله يارب يكون من ذوات الاربع .

فردت نورا على مزاحها بفكاهة: اهو ذوات الاربع دي بقا هو الوحيد اللي هيليق معاكي يا سلمى

ضحكت الفتيات جميعا على ذلك ثم قالت هالة: خلاص بقا اهو بقينا اتنين في الشلة مخاطيب . تعرفوا بقا انا نفسي في ايه يا بنات؟ نفسي ان كلنا كدة يكون فرحنا في ليلة واحدة ونعمله كمان فرح جماعي ,بجد هيبقا تحفة, بس اعمل ايه بقا الست مريم واضح انها مستعجلة وهتسبقنا .وعلى العكس الست حياة اللي مقلهاها اوي وناوية تبلط في الخط

فغمزت لها مريم وهي تشير ناحية حياة بعينيها: لا ما هو واضح كدة ان عقدتها هتفكك قريب ,ونبقا نسايب

فهتفت سلمى: اوباللا, ايه الكلام الجديد دة بقا ؟ ما تفهمينا يا ست حياة .

بدا ان حياة كانت في عالمها الخاص بعيدا عن مزاح صديقاتها ولكنها افاقت على صوت هالة القلق وهي تنادي باسمها: حياة! حياة! فيه ايه مالك؟

حياة: هه! مالي ؟ !

سلمى بنظرات خبيثة: احنا اللي عاوزين نفهم يا ست حياة. يا ترى الكلام اللي بتقوله مريم دة حقيقي؟

حياة باستغراب: كلام ايه؟

سلمى: قال ايه ياختي؟ شكلكم كدة انتي وهية هتبقوا نسايب قريب .

حياة بعدم فهم: نسايب! يعني ايه؟

مريم بنظرة خاصة: ما تحاوليش تخبي علينا يا مريم, كان باين اوي على البشمنهندس وليد انه مهتم بيكي طول الحفلة وخصوصا اصراره انه يوصلك بنفسه .

حياة باستنكار: انتي بتقوللي ايه يا مريم؟ بلاش كلام فارغ. بقا عشان الرجل قام بحركة جدعنة معايا بيقا خلاص بقا واقع في دباديبي؟

مريم: لا يا حبيبيتي . بس الواد كان باين عليه هيمان اوي .

فصاحت حياة في صديقتها بغضب: مريم ! لو سمحتي .

ما سر اهتمامه؟

عادت مريم الى الفيلا في وقت الغروب لتجد جدها يجلس أمام طاولة في الحديقة يتناول فنجانا من القهوة يتأمل في منظر الشمس وهي راحلة وكأنه يشبهها بعمره الذي على وشك الانتهاء. وقفت مريم للحظات تنظر الى جدها من بعيد في حزن فهي حقا تخشى أن تفقده ولا تتصور العالم من دونه خاصة بعد وفاة أبيها. كانت مريم تنوي الذهاب الى غرفتها مباشرة دون ان تقطع على جدها تأملاته ولكنها عدلت عن ذلك وقررت الذهاب اليه: السلام عليكم

قالتها مريم بصوت مرح وهي تحيط رقبة جدها بيديها وتضع قبلة حنونة على خده , فابتسم عبدالرءوف وهو يرد: وعليكم السلام. حمدالله على سلامتكم يا مريم. عملتي ايه في الامتحان؟

أجابت مريم وهي تجلس على كرسي أمامه في نشاط: الحمد لله يا جدو. زي اللي قبله. أنا ناوية ان شاء الله مش هجيب اقل من امتياز, اصلي ناوية بقا يا سيدي اني يا اما اشتغل معيدة يا اما افتح سنتر ملابس. وطبعا توفيراً لفلوس جدو حبيبي أنا بقول ان معيدة أفضل .

فتبسم جدها ضاحكا. فهي الوحيدة التي كانت قادرة على اسعاده بشتى الطرق: يا بنت يا بكاشة انتي عارفة ان كل اللي انتي عاوزاه هعمله سواء كدة او كدة وما تنسيش كمان انك هتبقي مرأة يوسف جلال يعني حنة سنتر صغير زي اللي بتتكلمي عليه أكيد مش هيكون كثير عليكي .

هربت الابتسامة من ملامح مريم عندما تذكرت هذا الامر الواقع الذي لم تستطع تغييره. انتشلها صوت جدها من هذا الحزن الذي سيطر عليها فجأة والذي قد لاحظته عبدالرءوف ولكنه قد تعمد تجاهله: على فكرة يا مريم اعلمي حسابك اننا هنسافر البلد الاسبوع الجاي .

مريم مندهشة: البلد! مش فاهمة يا جدو, ليه يعني؟ هو حصل حاجة؟

عبدالرءوف: لا. مفيش حاجة حصلت, الحقيقة انا و يوسف اتفقنا اننا نأجل الكلام في الموضوع دة معاكى لحد ما تخلصي امتحانات .

جذب ذكر اسم يوسف انتباه مريم, فاسمه دائما كما تعتقد مرتبط بوقوع مصيبة لها, استطرده عبدالرءوف حديثه بعد ان حصل منها على الاهتمام الذي كان يريد: يوسف اقترح عليا اننا نعمل الفرح في البلد وانا وافقت لأن حاجة زي كدة هترد اعتبارنا في البلد بعد اللي عمله حمدي الله يرحمه وخصوصا انه هيبان لأهل البلد كلهم ان هما اللي طلبوا النسب .

مريم بضيق: بس يا جدوا ازاي يعني؟ انا لسة اصلا مش اخترت الفستان وكمان كنت ناوية اتفق مع بيوتي سنتر معروف هنا اصحابي قالوا عليه كويس دة غير القاعة اللي كنت ناوية أختارها .

عبدالرءوف: كل دة سهل ترتبيه , الفستان وقدامك اسبوع كامل تقدري تختاريه فيه , اما بالنسبة للبيوتي سنتر قوليلنا على اسمه واحنا هنتفق مع صاحبه عشان بيعتلنا على البلد فريق عمل من عنده يوم الفرح . وبخصوص القاعة فأعتقد ان ملهاش لزوم وهيعجبك اوي شكل الفرح على الطريقة الصعيدي . قلتي ايه بقا؟

أنا ملاذك

كان عبدالرءوف الكامل يجلس أمام مكتب يوسف الذي جلس خلف مكتبه ويستمع الى عبدالرءوف وهو يشكره: اللي عملته دة يابني ببين أد ايه انت انسان أصيل ويخليني متأكد أكثر ان اختياري كان في محله فرد يوسف مبتسما: الموضوع ما يستاهلش كل دة يا عمي .

كان عبدالرءوف قد بدأ يعتاد على لقب عمي من يوسف بعد كتب كتابه على مريم فكان هذا هو اللقب الوحيد الذي يتناسب مع الوضع الجديد , فقال عبد الرءوف بنبرة بها بعض الحزن: لا يا بني يستاهل . انت ما تعرفش مدى ارتباط مريم بصاحبها حياة . هي تقريبا أول واحدة تتعرف عليها من أول ما جات مصر وخصوصا بعد ما فشلت محاولاتي في التقريب بينها وبين عمته . معرفتها بحياة فرقت معاها كتير أوي وخصوصا ان البننت فعلا كويسة ومحترمة وكان غيابها يوم الفرح ممكن يآثر كتير على مريم .

قال يوسف محاولا تغيير دفة الحديث: المهم . هما خلاص سافروا؟

عبدالرءوف: أه وزمانهم قربوا يوصلوا . انا طلبت من مريم انها تكلمني أول ما توصل .

يوسف: طب وحضرتك؟ هتسافر امتي؟

عبدالرءوف: انا هخرج من عندك وأطلع ع المستشفى هقابل الدكتور جمال وبعدين هسافر على طول .

يوسف بقلق: انت نويت خلاص؟

عبدالرءوف: بعد الفرح على طول ان شاء الله وأول ما اطمن على مريم . أرجوك يا يوسف خلي بالك منها .

فوضع يوسف يده على كف عبدالرءوف ليطمئنه وهو يقول: ما تقلقش . بس انت لسة مصر ع الموضوع دة؟

فهم عبدالرءوف ما يرمي اليه يوسف فقال: دة الحل الوحيد اللي أدامي عشان أبقا مطمئن على مريم وكمان على وردة عمتها . انت عارف اني لو سبت الامور زي ما هية عايمة كدة مش بعيد أرجع والاقى كل حاجة خربت . وكمال بقا يعمل ما بداله .

يوسف: اللي تشوفه .

في تلك اللحظة سمع الاثنان طرقا على الباب فقال يوسف: ادخل

دخل وليد وقد ابتسم فور رؤيته لعبدالرءوف: أنا أسف كنت فاكرك لوحدك . ازيك يا عبد الرءوف بيه .هبقا أجيلك بعدين بقا يا يوسف .

وقبل أن يتوجه مرة أخرى ناحية الباب أوقفه صوت يوسف: استنى يا وليد . مفيش حد غريب . تقدر تقول اللي عندك .

فقال عبد الرءوف لوليد باسم: جرى ايه يا باشمهندس؟ مش عاوز تقعد معايا ولا ايه؟

فقال وليد محرجا: يا خبر. ودي معقولة بردو؟ انا قلت انكم ممكن تكونوا بتتكلموا في موضوع مهم ولا حاجة .

عبدالرؤف: لا يا سيدي, أنا خلاص كنت ماشي .

وليد ضاحكا: ليه بس؟ هو زي ما بيقولوا ولا ايه. اذا حضرت الشياطين يعني؟

ملاك أم شيطان

فاقترب منها يوسف بخطى ثابتة وهو يقول: متشكرة على ايه؟ انتي خلاص بقيتي مراتي. وحمایتك بقت مسؤليتي. ومفيش حد في الدنيا دي كلها هيقدر يمس شعرة منك طالما انا لسة على قيد الحياة. 1

لم تستطع مريم الرد بل اكتفت بالنظر ناحية الأرض أما يوسف فقد وقف لحظات يتأمل مريم بلامحها الطفولية الجميلة والتي تمتاز بالبراءة جعلته يشك في أن مثل هذه الشابة قد قضت ولو يوم واحد في بلاد الغرب. ودون أن يشعر وجد نفسه يقترب منها أكثر حتى لم يعد يفصلهما سوى سنتيمترات قليلة, ثم رفع يده ليلمس خدها الناعم, فأجفلت مريم للمسته وجعلها ذلك تتراجع الى الخلف ينتابها بعض الخوف و التوتر, بدا على يوسف وكأنه متفهما لردة فعلها في البداية ولكن عندما تكرر الموقف جعله ذلك يشك في الأمر, فسألها: فيه ايه يا مريم؟ مالك؟

فسألته مريم بخوف: مالي؟

يوسف موضحا: يعني شايف اني كل ما يقرب منك بتبعدي .

تحولت نبرة مريم من الخوف الى العداة ووجهت نظراتها الى عيني يوسف مباشرة: وانت تقربلي ليه؟ وبصفتك ايه أصلا؟ فاجأه السؤال, ولكن ليس يوسف جلال هو من يقبل أن تشعر أي امرأة بعجزه أو بأنها قد تغلبت عليه فأجابه بثبات وبعيون جامدة: بصفتي اني بقيت جوزك والمفروض ان دي ليلة دخلتنا .

مريم: دة عشم ابليس بالجنة زي ما بتقولوا عندكم. 2

يوسف مستوضحا: قصدك ايه؟

مريم: يعني انت عمرك ما هتكون جوزي ولا انا عمري هبقا ليك .

بدا يوسف وكأنه قد تلقى منها صفة قوية, فلم يستطع هذه المرة أن يتمالك أعصابه او ان يتجاهل نوبة الغضب الشديدة التي قد اجتاحتها فجذبها بشدة من ذراعها وكادت أن تلتصق به وهي تصرخ من الألم, ثم قال لها وهو يجز على أسنانه: انتي فاهمة كويس معنى كلامك دة ايه؟ او عي تكوني فاكرة ان حركة الشهامة اللي عملتها معاكي من نص ساعة هتخليني اتساهل معاكي .

لم ترد مريم أن تظهر لها الخوف الذي شعرت به فقالت له متحدية: او عي انت اللي تكون فاكرا ان عشان خاطر اللي عملته معايا اني هخضعلك وهسملك نفسي بسهولة .

فهزها يوسف بعنف وهو يقول: انتي بتقولي ايه؟ انتي مراتي. فاهمة يعني ايه مراتي؟! !

مريم وهي تتجاهل آلامها: انت اللي اظاهر عليك نسييت اني اصلا اتجوزتك غصب عني. والجواز اللي بالاكره زي جوازنا دة كان لم يكن .

يوسف صائحا بغضب: والمأذون؟ والشهود؟ وعقد الجواز؟

مريم: باطل. طالما كان غصب عني .

يوسف: مريم! انتي كنتي تقدري تقولي لا .

فأسرعت مريم تهز رأسها في اعتراض: لالالا. ما تأخرش نفسك انت. شكلك مستعجل, أنا هاخذ تاكسي .

حياة على المحك

كانت مريم تركب في السيارة بجوار يوسف في صمت تام الى ان سألته وهي تدير وجهها اليه فجأة وبعبسية دلت على مدى ما تكتمه من غضب: ممكن بقا اعرف احنا رايعين فين دلوقت؟

فرد يوسف بهدوء ودون ان يحول نظره عن الطريق أمامه: لو صبرتي شوية أكيد هتعرفي .

ثم التوى فمه بسخرية وهو يقول: ما تخافيش, اكيد مش بخطط اني اخطفك. فياريت تهدي .

احمر وجه مريم غضبا من توبيخه المبطن, ولكنها لم تتمكن في هذه اللحظة من ان ترد له الصاع صاعين كما كانت ترغب لأن السيارة توقفت فجأة فنظرت مريم أمامها, ولفرط دهشتها رأت أنهما توقفا أمام أحد معارض السيارات, لم تستطع ان تخمن السبب ولم يترك لها يوسف الفرصة لتستفسر عن حقيقة الأمر حيث كان قد خرج من السيارة ودخل المعرض, اما هي فمن موقعها استطاعت ان ترى مدى ترحيب صاحب المعرض به, بالطبع فيوسف جلال ليس بالزبون الهين لأي تاجر, وما هي الا دقائق معدودة حتى عاد يوسف وطلب منها التزجل من السيارة فوافقت مريم على مضض وفي عقلها العديد من التساؤلات. اتجه بها داخل المعرض وقدمها لصاحب المعرض ذو الابتسامة التي قد حرص على ان لا تفارق وجهه: مريم الكامل, المدام .

صاحب المعرض: اهلا وسهلا يا فندم, احنا عندنا هنا احدث الموديلات اللي اتمنى انها تعجب حضرتك, وان شاء الله مش هتخرجي من هنا الا لما تلاقى طلبك .

كانت مريم تجهل تماما عما يتحدث عنه فلم تعلم بما يمكنها ان تجيب, وبالطبع تولى يوسف ذلك فقال للرجل: ان شاء الله. ممكن بقا انا والمدام ناخذ جولة لوحدنا كدة في المعرض .

فأسرع الرجل: طبعاً طبعاً يا يوسف بيه, المكان مكانك , اتفضل حضرتك ولو احتجتني هتلاقيني في خدمتك .

يوسف: متشكر

وتركهم الرجل ورحل, فجذب يوسف مريم من يدها وكأنها طفلة يسحبها خلفه حتى وصلا الى مجموعة من السيارات الفاخرة باهظة الثمن, فأفلتت مريم يدها بعنف وهي تقول له بصوت منخفض بحيث لا يستطيع احد العمال سماعهما ولكنه كان يحمل الكثير من الغضب: سيب ايدي. ولازم تفهم اني مش هتحرك خطوة تاني غير لما اعرف احنا بنعمل ايه هنا بالظبط. 1

يوسف: تفكري الناس بتروح معرض السيارات ليه؟

تجاهلت مريم السخرية اللادعة التي يحملها كلامه وسألته: لو كنت عاوز تشتري عربية, افكر دي حاجة ما تخصنيش. وما كنش لازم تجيبني معاك .

فقال يوسف بنبرة جادة: معاكى حق. فعلا ما كنش لازم اجيبك معايا, بس انا قلت ان يمكن يكون دة حقك في انك تختاري العربية اللي المفروض هتكون بتاعتك .

مريم: بتاعتي انا! ومين قالك اني عاوزة عربية؟ انا عندي عربييتي .

يوسف مصححا: قصدك عربية جدك اللي خلاها تحت امرك .

مريم بتحدي: جدو اشترى العربية دي مخصوص عشاني وكاتبها باسمي, يعني بقت عربييتي .

يوسف باصرار: ولو. انا مقبلش ان حد يصرف على مراتي طول ما هي شايلة اسمي حتى جدها نفسه .

ما بين الجاني والضحية

في شقة محمود البديري, وبعد أن أم أسرته في صلاة الفجر كما كان يفعل دائما, استأذن كريم وهو يتشاءب: طب عن اذنك يا بابا هروح أكمل نوم .

محمود: ماشي يا كريم,بس هبقا أصحيك تنزل معايا لصلاة الجمعة .

كريم: اوك يا بابا .

ووجه محمود ابتسامة صافية لزوجته وهو يقول لها: ما تقومي يا أم كريم تعمليلنا كوبايتين شاي من اديكي الحلوين دول .

فأسرعت حياة: خليك يا ماما, انا هقوم أعمل الشاي .

فأوقفها صوت والدها قبل أن تنهض من على سجادة الصلاة: خليك انتي يا حياة, انا عاوزك في كلمتين .

مها بابتسامة هادئة ونظرة ذات معنى لزوجها: خلاص,خليك انتي يا حياة .

وتركت مها حياة لوحدها مع محمود الذي نهض من على الأرض ليجلس على الاريكة وأشار الى ابنته: تعالي هنا يا حياة اقعدني جنبتي .

فأطاعت حياة الأمر على الفور, وبعد أن جلست على الاريكة بجوار والدها قالت له وفي عقلها العديد من علامات الاستفهام: تحت أمرك يا بابا .

محمود ولم تفارق الابتسامة وجهه وقد قرر أن يسلك أقصر الطرق للوصول لهدفة: قوليلي بقا ايه رأيك في علاء ابن عمك؟

شعرت حياة بأن الدماء قد هربت من وجهها, ولكنها حاولت أن يبدو صوتها طبيعيا وهي تسأل: رأيي فيه من ناحية ايه يا بابا؟

محمود: من كل النواحي, يعني أخلاقه, تفكيره, تعليمه, كل حاجة .

لم تعلم حياة بما تجيب, ولكنها حاولت الابتسام: طب وهو انا أعرف علاء أكثر منك بردو يا بابا؟

محمود بمرأوة: والله أنا عن نفسي شايف انه انسان كويس وأخلاقه عالية وأد المسئولية .

حياة باستسلام: خلاص ببقا هو كدة فعلا .

محمود: يعني انتي موافقة !

فسألت حياة بارتباك: موافقة! على ايه يا بابا .

محمود: على انه بييجي يخطبك .

فيما يتعلق بالمثل الشعبي الشهير "وقوع البلاء ولا انتظاره", فهذا المثل لا ينطبق على حالة حياة في تلك اللحظة, فهي كانت تعمل دائما على تأجيل تلك اللحظة وللأبد, ولكن ها هي تأتي ولا تعلم كيف تتصرف؟ فعلاء علاوة على انه ابن عمها الا انه أيضا كما وصفه والدها شاب ممتاز تقريبا في كل شيء, ولا يمكن لأي فتاة متعقلة أن ترفضه لأي سبب آخر غير السبب الذي لا تستطيع حياة الافصاح عنه لوالديها .

رأى والدها أن صمتها قد طال فقال ليستحثها على الكلام: جرى ايه يا حياة؟ ساكتة يعني وما قولتيش رأيك! ولا زي ما بيقولوا السكوت علامة الرضا .

لم تعلم أتظل متمسكة بصمتها وليظن والدها كما يشاء أم انها تفاجئه برفضها لتضع نفسها في دوامة من التحقيقات لن تنتهي؟ ولكنها في النهاية قررت أن المماطلة في هذا الامر ستكسبها بعض الوقت للتفكير السليم في كيفية الوصول الى مخرج مناسب من تلك المشكلة, لذلك تصنعت ابتسامة خفيفة على محياها وهي تجيب: لا يا بابا, بس أنا كنت عاوزة شوية وقت عشان أقدر

أفكر في الموضوع دة كويس, وكمان ما تنساش ان انا لسة باقي سنة في الكلية عاوزة أخلصها الاول, وبعد كدة ابقا افكر براحتي في موضوع الجواز دة .

زواج تحت التهديد

في مكتب عبدالرؤف بشركة الكامل, اجتمع يوسف بكبار موظفي الشركة ليصب عليهم غضبه: دة بيقا اسمه كلام فارغ ولعب عيال. يعني ايه نخسر مناقصة زي دي؟ وازاي اللي اسمه حامد دة يقدم مميزات أفضل منا وكمان بسعر أقل؟! !

فقال محمد جمال بصوت متلجلج وقد كان أحد الموظفين الموجودين بالاجتماع: قصدك ايه يعني يا فندم؟

فرد عليه يوسف بلهجة تنذر باقتراب ثوران بركان الغضب بداخله ومشددنا على كل كلمة يقولها: قصدي بالظبط اللي انت فهمته يا فندم, اصل مش معقول يعني واحد زي اللي اسمه حامد مسعود ياخذ منا مناقصة زي دي بسهولة كدة و تحاول تقنعني ان الموضوع عادي والمناقسة كانت شريفة .

تكلم موظف آخر بحدة: يا فندم حضرتك كدة بتشكك في staff العمل كله .

فأشار يوسف باصبعه ناحية الجميع بنظرة اتهام لا يمكن لأحد ان يخطئها ولهجة قوية حازمة: وفضلوا كلكم محل شك عندي لحد ما اعرف الحقيقة ولو دة ما حصلش وعد مني انا شخصيا اني هغير ال staff كله. اتفضلوا على مكاتبكم .

وخرج الجميع ماعدا واحدا, فسأله يوسف بنفاذ صير: خير يا وائل؟ فيه ايه؟

وائل: انا اسف يا فندم, بس كنت عاوز اقول لحضرتك حاجة كدة .

يوسف بعصبية: لخص يا وائل, انا مش ناقص أَلغاز .

وائل: انا شاكك في واحد معين هو اللي ممكن يكون ورا خسارتنا للمناقصة دي .

فظفر له يوسف باهتمام, ولكنه قال له بلهجة ثابتة: مفيش حاجة عندي اسمها شاكك, أدامك أد ايه عشان تقدر تجيبلي دليل على اتهامك دة؟

وائل: طب هو حضرتك مش عاوز تعرف الاول مين دة اللي انا شاكك فيه؟

يوسف بكل ثقة: محمد جمال .

صدمه اطلاع يوسف على الأمر, وما صدمه أكثر هي ثقة يوسف وهو ينطق الاسم: طب مادام حضرتك عارف, ليه مش راضي تتخذ معاه اي اجراء لحد دلوقت؟

يوسف: لأنني زيك شاكك, وانا مش هحاسب انسان لمجرد الشك, وائل! انا هعتمد عليك انت في الموضوع دة. سواء كان محمد جمال أو غيره, انا عاوز دليل في ايدي قبل ما عبد الرؤف بيه يرجع. فاهم؟

وائل: فاهم يا فندم .

يوسف بلهجة تشجيعية: ربنا يقدرك. ياللا بقا اتفضل دلوقت على مكتبك .

وائل قبل أن يغادر المكتب: أمرك يا فندم .

وخرج وائل لتأتي هناء بعده تقول: اسفة يا فندم, لكن مدام علياء برة أدليها نص ساعة, أدخلها؟

يوسف بتأنف: علياء! مش وقتها خالص .

هناء: لو تحب سيادتك, ممكن أقولها ان حضرتك وراك مواعيد أو اجتماعات تانية .

يوسف: لا, دخلها, وبيقا اطليلي فنجان قهوة .

هناء: حاضر يا فندم .

بوادر الغيرة

الحلقة الخامسة عشر

*بوادر الغيرة *

في قاعة المسرح بالجامعة, قد اجتمع أعضاء أسرة" ملكة بأخلاقي" وقد كان عددهم يقرب العشرين طالبة. كانوا يعدون للمسرحية التي سيقومون بتأديتها في حفل الاستقبال للعام الدراسي الجديد. قامت سلمى بدور المخرج وكانت رغم مرحها و دعاباتها التي لا تنتهي الا انها تمتاز بالجدية والصرامة في وقت العمل, وبعد أن انتهت من توزيع الادوار بدأت تقول بصوت منهك: بسسس كدة بقا مش فاضل غير دور البطل والبطلة, وانا شايفة ان أحسن واحدة ممكن تقوم بدور البطلة هي حياة .

تفاجأت حياة من ذلك الاختيار الغير مستحب بالنسبة لها وبدأت بالاعتراض:انا؟! لالا, شوفولكم حد غيري , انا منفعش .

أيدت هالة رأي سلمى وهي تقول محاولة اقناع حياة بالعدول عن رفضها: بالعكس يا حياة, انا مع سلمى في رأيها , وبصراحة الدور ده لايق عليكى جدا, ده غير انك ممثلة موهوبة فعلا, فاكرة أول سنة لما مثلتي في المسرحية اللي عملها فريق الجواله؟ كنتي فعلا ممتازة بالرغم من ان الدور كان صغير .

قالت حياة في اصرار واضح على رأيها: لا يا جماعة. ده كان زمان, اما دلوقت فانا مش هقدر أقول كلمتين على بعضهم وانا ع ال stage.

وهنا استخدمت سلمى سلطتها وهي تقول بصرامة: مفيش حاجة اسمها زمان ودلوقت دي موهبة عندك وبتفضل معاكي في أي وقت.وبصراحة بقا أنا مش شايفة أي حد غيرك ينفع للدور ده .

أشارت حياة فجأة ناحية مريم وهي تقول: مريم عندكم أهى. هي اللي تنفع .

أجابت مريم نافية بشكل قاطع: لا يا ستي, انا كفاية عليا الديكور . ومش هعرف أوفق بين الاتنين .

وهنا كانت الكلمة الأخيرة لسلمى التي قالت بحزم: بيقا خلاص يا حياة. انتي اللي هتقومي بدور البطلة, ومفيش كلام ثاني .

حياة باستسلام: خلاص بقا أمري لله .

فتنهت سلمى بارتياح, ثم قالت: ابوة كدة خرينا نفكر بقا في المشكلة الأساسية .

هالة: هي ايه المشكلة دي؟

سلمى: مين اللي هيبقا البطل؟

فقالت حياة بلهجة طفولية: مليش دعوة, انا عاوزة حسين فهمي .

فأشارت لها نورا بغیظ: ياختي اتلهي, ده انتي أخرك سليمان عيد وهنديله فلوس كمان عشان يرضى يقف قصادك .

فقالت مريم بجدية: اسكتوا بقا شوية يا بنات, احنا فعلا في مشكلة حقيقية. احنا ما نعرفش حد من الشباب بيعرف يمثل ويقبل يكون معنا .

وهنا نظرت سلمى الى نورا مؤنبة بتهكم: مش كان المفروض بردو يا عم نجيب محفوظ انك تتم جميلك معنا وتخلي المسرحية كلها بنات بدل الورطة اللي احنا فيها دي؟

عادة ما تتبدل الابتسامة بدمعة

"أحيانا يغار الرجل على امرأة تحبه حتى لو لم يكن يحبها , وتغار المرأة على رجل يحبها حتى لو لم تكن تحبه "

مقولة قرأتها مريم ذات مرة وهي تتصفح الانترنت, ولكنها الآن وهي تجلس بجوار يوسف في سيارته وهما في الطريق الى المطار لاستقبال جدها تتساءل ما اذا كانت تلك المقولة تنطبق على حالتها الآن. فهي وان كانت على حسب زعمها لم تقع في حب زوجها الا انها قد شعرت بالغيرة حين رآته في ذلك الوضع مع تلك الفاتنة السمراء .

:ما تقلقيش يا مريم, جدك بخير وان شاء الله هيبقا أحسن. 1

انتبهت مريم من شرودها على كلام يوسف, وقد شعرت بالارتياح حين ظن ان صمتها ذلك يعود الى مجرد تفكيرها في جدها وقلقها على حالته, فقالت وهي تتجنب النظر اليه: ان شاء الله .

توقفت سيارة وليد جلال أمام محل المجوهرات الذي نصحه يوسف بالذهاب إليه لشراء الشبكة بما انه خبير بتلك الأمور فخاتم أو أسورة من احدى المعادن والأحجار الكريمة هي أقل هدية من الممكن أن يقدمها رجل كيوسف جلال لحدى صديقاته. خرج وليد من السيارة وبصحبته حياة و والديها ودخلوا المحل فاستقبلهم صاحب المحل وأخذ يعرض عليهم ما تطلبه مها, أما حياة فكانت توافق على كل ما تختاره والدتها بصمت ودون أن تبدي برغبة حقيقية في مشاركتها الاختيار وهي تشعر بنظرات وليد مسلطة عليها ولا تعلم كيف يمكن أن تتجنبها؟

وبعد أن انتهت مها من عملها بدأ الصائغ في وزن ما انتقته وأبلغهم بالثمن فسأله وليد: انتو بتقبلو credit card؟

فاعتذر منه صاحب المحل بتهذيب: للأسف يا فندم احنا مش بنقبل credit غير من زباين المحل منعا لأي مشاكل .

وليد بضيق: أنا وليد جلال أخو يوسف جلال سليم .

كان لذكر اسم يوسف وقع السحر على اذن صاحب المحل حيث بدأ يقدم أسفه واعتذاراته: أهلا وسهلا يا وليد بيه, انا اسف جدا لانني ما عرفتش حضرتك من الاول. فعلا يوسف بيه بلغني بزيارة حضرتك النهاردة الصبح. شوف حضرتك الطريقة اللي تحب تدفع بيها ايه؟ او خلي الحساب علينا خالص. 1

وليد: متشكر .

وأخرج وليد بطاقة الائتمان خاصته وأعطاها للصائغ, وبعد انتهاء اجراءات الدفع, سلمه الرجل الشبكة مع كلمات التهاني المعهودة في تلك المناسبات .

وفور خروجهم وحين عادوا الى السيارة قدم العلبة القطيفة لحياة وهو يقول لها بلهجة متهمكة: مبروك يا عروسة .

وعندما رأى علامات التردد على وجهها ونظرات الحذر في عينيها سألتها: ايه؟ مش عاوزة تاخدي شبكتك .

وهنا تدخلت مها بابتسامة واسعة وهي تأخذ العلبة من يد وليد: ودة اسمه كلام يا وليد يابني؟ هي بس أكيد مكسوفة حبتين. مبروك عليكم .

حيرة العاشقين

يقال دائما " لا ينام الا خالي البال", أقر أبطالنا الأربعة بصدق تلك المقولة هذه الليلة حيث لم يغمض لأي منهم جفن أبدا حتى أذان الفجر ولكن كما يقولون "فكل يغني على ليله", ففيما يتعلق بمريم فقد جافاها النوم وهي تفكر في مدى تطور علاقتها بالنسبة ليوسف؟ على الأقل بالنسبة لشعورها هي, فلقد بدأت تشتاق لكلماته, تترقب ابتسامته, بل انها أصبحت تحن لسخريته

مهما كانت لاذعة. ولكنها تساءلت هل هي بالفعل على استعداد لتقبله كزوج لها؟ وماذا عنه هو؟ انها تعرف تمام المعرفة ان رجلا كيوسف جلال من الصعب عليه أن يكشف عن شعوره الحقيقي , بل فلنقل أنهم يمكنه أن يعتقد أن تلك الأحاسيس والمشاعر نقاط ضعف يجب ألا يعلمها أحد غيره, ولكن خطر في ذهنها صورة تلك المدعوة علياء وهي تتمايل وتتدلل أمام زوجها دون أن يبدي أي نفور منها وهذا ما جعلها تتخيله ذلك الدون جوان الذي سمعت عنه قبل الزواج والذي يبدو انه لا يشعر بالنفور الا منها هي وحدها "زوجته". 2

أما عن يوسف جلال الذي كان يجلس في سريره يقرأ في أحد الكتب كعادته الا ان هذه المرة لم يستوعب عقله كلمة مما قرأ, فلماذا تحتل تفكيره بتلك الطريقة التي لم يعتادها مع أي امرأة؟ انه بالفعل قد عرف الكثير من النساء, ولكن لم تستطع أي منهن أن تحتل تفكيره كما تفعل هي الآن ويمكننا القول انه قد أذمن كل حركاتها الطفولية, وقد أصبح يرغبها بشدة على قدر رفضها له, ولكنه يجهل الطريق للوصول إليها. فبالرغم من انها زوجته الا انه لم يعتد ان يلاحق امرأة مهما كان تعلقه بها وخصوصا وهو متأكد من أنها لن تستجيب له. اذن فالحل الوحيد أمامه الآن هو ان يتناسى وجودها بالقرب منه ويستكمل حياته كما كانت قبل ظهورها. 1

وإذا ذهبنا الى وليد نجد انه ليس بأفضل حالا منهما, فبعد أن خاصم النوم عينيه قد هجر فراشه وخرج الى الشرفة لعل نسيم الليل يسكره فيغلبه النوم, ولكن حينما وقعت عيناه على ضوء القمر الذي كان في طور البدر في تلك الليلة, ليرى وجهها وقد ارتسم على صفحته ولكنه كان وجهها حزينا بعينين تملؤهما الدموع تنظر اليه بألم وكأنها تعاتبه, نعم تعاتبه! وهو يعلم ان لها الحق لذلك, فلقد كان قاسيا معها لأبعد الحدود, ولكنه لا يستطيع أن يتراجع عن القرار الذي قد اتخذه, لذا أصر أن يستمع إلى أحكام العقل وسيلغي دور القلب إلى أن يأتي حينه. 1

أما هي فلم تجد سواه معين على شداؤها, لذا فبعد أن قامت ليلها ظلت جالسة على سجادة الصلاة تناجي ربها ودموعها تسبقها بدون توقف وهي تتذكر كل كلمة جارحة خرجت في حقها من بين شفثيه: إلهي إن يكن ذنبي عظيم فعفوك يا إله الكون أعظم. لا إله إلا أنت سبحانك إني كنت من الظالمين. يارب أنا عارفة اني عصيتك كثير وإن كان دة عقابك ليا على معصيتي فأنا راضية بيه و أنا لا أسألك رد القضاء ولكني أسألك اللطف فيه. ربي اني لا أسألك رد القضاء ولكني أسألك اللطف فيه .
و حين يندلع الحب

أقيم حفل الزفاف في حديقة الفيلا كما كان متفق عليه وقد كان بالطبع على قدر كبير من الاستعدادات والفخامة ومسرح العروسين هو أيضا يمتاز رغم بساطته بالجمال والزينة عالية الأناقة والبهاء, كما حضره كبار الشخصيات بالدولة وكبار رجال الأعمال الى جانب أسرة حياة وصديقاتها. ويحيي الحفل بعض الفرق والمطربين المشاهير .

وفي مكان ما بالحديقة وقفت مها بجوار زوجها تتأمل في كل شيء حولها بانبهار و ذهول وهي تقول لمحمود: شايف يا أبو كريم العز والأبهة .

محمود برزانة: قولي ما شاء الله يا أم كريم .

ام كريم بتبرم: اخص عليك يا ابو كريم. انت فاكرني بحسد ولا ايه؟ ربنا يزيدهم وبيباركلهم. ماهو في الاول وفي الاخر بنتنا هتتمتع في العز دة معاهم .مش هتبقا واحدة منهم؟

محمود: ادعيلها ربنا يسعدها مع جوزها. احنا مش عاوزين أكثر من كدة انشالله حتى تعيش معاه في كوخ وكمان ما تنسش ان وليد مقرر انه يبدأ حياته بنفسه بعيد عن أخوه .

فقالته مها بامتعااض: يا خوية انا مش عارفة هو بيعمل كدة ليه؟ ماهو المفروض انه بردو ليه في المال دة زي اخوه يعني معقول برضه هيسيب حقه بالشكل دة؟

محمود بايضاح: يا ستي هو مش هيسيب حقه ولا حاجة وكمان الباشمهندس يوسف مش ممكن ياكل حق أخوه اللي هو اصلا أعز انسان على قلبه. بس وليد عاوز يثبت نفسه وشخصيته حاسس ان كل اللي حواليه دة من تعب يوسف وكفاحه ودة حقيقي

لان أبوهم الله يرحمه مات وكانو لسة صغيرين والشركة كمان كانت لسة في بدايتها فالباشمهندس يوسف بقا بمساعدة عبدالرءوف الكامل ليه هو اللي وصلها للمكانة اللي هي فيها دلوقت. ووليد بقا عاوز يبدأ من الصفر زي ما اخوه تقريبا عمل عشان كدة حتى في الشركة مصر انه يقبض مرتب عادي زي كل الموظفين .

مها: ربنا يوفقه يا خوية عشان يقدر يسعد البنات ويهنيها .

محمود: يا ام كريم من امتي والسعادة في الفلوس يعني؟ سعادة بنتنا الحقيقية هتكون في حب جوزها ليه وده اللي انا شايفة في عينيه عشان كدة انا مطمئن على حياة .

وفي الناحية الأخرى نجد صديقات حياة تقفن معا جنبنا الى جنب يتحدثون بمرح, فقالت هالة وهي تنظر الى الدبلة في يدها اليمنى: وانتي بقا امتي هتنتقلي للابيد الثانية؟ انا خلاص حسيت اني خللت في الخطوبة دي حتى مريم وحياة اللي اتخطبوا بعدي اتجوزوا قبلي .

نورا: طب ما تقولي لحبيب القلب يشد حيله شوية؟

هالة: لسة ياخوتي الشقة مش هتخلص الا بعد سنة تقريبا .

فقالت سلمى بغيط: صحيح الناس دي لا حمد ولا شكرانية. احمدي ربنا يا هيلة انك عرفتي تكليشي واحد وخلص. اما الجواز دة بقا بييجي في وقته. الركب والباقي عليا انا والغلبانة دي .

الزوج العاذب

فتح وليد باب شقته, وقد أفسح الطريق لحياة لكي تسبقه اليها, فدخلت حياة بخطى مترددة, بل لولا دخوله خلفها وإغلاقه للباب سريعا كان من الممكن أن تتراجع وتفر هاربة الى بيتها حيث أسرتها الصغيرة التي تشعر بينها بالأمان وهو ما تفتقده بالفعل في تلك اللحظة. أجالت حياة بعينها في أنحاء الشقة الواسعة فتلك أول مرة تطوؤها قدميها, لانها رفضت أن تفعل ذلك في اليوم الذي اختارت فيه فستان الزفاف بعد كلمات وليد المهينة لها. فوجدتها الآن تمتاز بالذوق الرفيع في كل شيء سواء من تناسق الألوان أو فخامة الأثاث وتوزيعه الدقيق في مختلف أنحاء الشقة بحيث يوضح مدى اتساعها وجمالها. ظلت حياة تتأمل محتويات الحجرة بدقة وإعجاب واضحين أبعدا للحظات عن الواقع الذي تعيشه, حتى انتفضت على صوت يهمس في أذنها من الخلف: عجبك الشقة؟

ابتعدت حياة عنه قليلا وهي تواجهه لتجيب على سؤاله بنبرة تمننت أن تبدو طبيعية: أه, جميلة ورقيقة أوي. ربنا يجعلها فتحة خير عليك ان شاء الله .

صحح لها وليد مشددا: علينا, ولا انتي نسيتي انك مراتي؟

هزتها الكلمة بقوة من الداخل وهو ما حاولت ألا تظهره له, ولكن بدا أن لا شيء يمكنه أن يخفى عن تلك النظرات المتحفصة, أو أن عينها كانت صادقة اللي أبعد الحدود, حيث سمعته يسألها بنظرات مسددة الى عينها مباشرة: ايه؟ خايفة؟

وعندما وجدها تغرق في صمت دون أي أمل في الرد, قال: بس ياربت ما يكونش مني .

وعندما اقترب منها وأمسك بيدها شعرت برعشة تسري في كل أنحاء جسمها, ثم قال وهو يسحبها خلفه برفق: تعالي أفرجك على باقي الشقة .

وقادها الى حجرة الصالون ثم الى حجرة الطعام التي تحتوي على طاولة متوسطة الحجم يحيط بها العديد من الكراسي ثم المطبخ وبعده الى حجرة نوم صغيرة وأنيقة أخبرها بأنه قد أعدها للضيوف ممن تحكم الظروف لبيبتوا عندهم ليلة أو أكثر, وأخيرا أدخلها حجرة النوم الرئيسية ذات السرير العريض وخزانة الملابس الكبيرة والتسريحة التي تشغل تقريبا منتصف الحائط, كما أنها تضم أريكة وزوجين من الكراسي ذات المساند المريحة .

اذن فهل جاء وقت تسديد الدين؟ وما ان خطرت على بالها تلك الفكرة حتى ارتعش جسمها تلقائيا, وقد لاحظ وليد ذلك وهو الذي كان يسد منفذ الباب بجسمه الطويل ويستند على الباب بمرفقه فسألها وهو يقترب قليلا منها: ايه؟ بردانة؟

لم يكن سؤالاً عادياً, بل كان فيه من السخرية ما جعل الدموع تتجمع في مقلتيها, فهي تعلم حق العلم أنه مدرك تماما لسبب ارتعاشها ولكن سؤاله كان فقط لاستفادها وكأن رؤيته لها تتألم سببا أساسيا يكمل به سعادته التي تسببت هي نفسها في انقاصها, ولكن هل ستستسلم له ليذيقها مزيدا من العذاب لن يمكنها تحمله؟

رجل بكل الأمزجة

"فشلت جميع محاولاتي

في أن أفسر موقفي

فشلت جميع محاولاتي

مازلت تتهميني

كأني هوائي المزاج , و نرجسي

في جميع تصرفاتي

مازلت تعتبريني

كقطار نصف الليل .. أنسى دائما

أسماء ركابي , ووجه زائراتي

فهواري غيب

والنساء لدي محض مصادفات

مازلت تعتقدين .. أن رسائلي

عمل روائي .. و اشعاري

شريط مغامرات

وبأنني استعمل اجمل صاحباتي

جسراً إلى مجدي .. ومجد مؤلفاتي

مازلتي تحتجين أني لا احبك

كالنساء الأخريات "

*****نزار قباني***** 2

كان كالأسد الجريح يزرع مكتبه ذهابا وإيابا, حسنا فهو بالفعل يعترف بأنه قد أخطأ, ولكنه لم يفعل ذلك إلا لإغاضتها فقط, لمجرد أن يرى ماذا يكمن خلف هذا القناع الجليدي الذي ترتديه؟ ولكنه لم يتصور أن يفلت الزمام من يده بهذا الشكل, فلقد استطاعت أن تجرحه دون أن تدري, هي المرأة الوحيدة التي استطاع كلامها أن يغزو قلبه بتلك الطريقة العنيفة, فلقد تدرب

كثيرا على غيرة النساء حتى اكتسب منها مناعة لا بأس بها, ولكن مع مريم كان الأمر مختلفا تماما, وقد حاول أن يعزي ذلك الأمر الى اتهامها المبطن له بالخيانة, ولكنه قرر يوسف ان يكون صريحا مع نفسه أكثر من ذلك, لذا لقد اعترف وان كان امام نفسه فقط بأن ما ازعجه هو علمه بأنها لم تهتم الا بكرامتها ووضعها الاجتماعي وكأنه لأول مرة في حياته يخسر نزالا مع امرأة , ولكنها لن تكون النهاية يا ابنة الكامل. فهي جولة واحدة من جولات عدة أعدك بأنني سأكون فيها الراجح بلا منازع .

سمع طرقات على الباب , أعادته الى الواقع, فجلس على كرسية خلف المكتب وقد عقد العزم أن يولي كل اهتمامه لعمله: ادخل .

فدخلت السكرتيرة مي وتمسك بيدها ورقة لفتت انتباه يوسف , فرفع نظرة عينيه الى مي بتساؤل: فيه ايه يا مي؟

قدمت مي له الورقة وهي تقول: دة فاكس لحضرتك لسة واصل حالا من لبنان .

أخذ منها الفاكس. وقال لها: طب روعي انتي دلوقت يا مي واطبيلي فنجان قهوة .

مي: امرك يا فندم .

وبعد ان خرجت السكرتيرة , القى نظرة الى الفاكس يقرأه, وما ان انتهى وضعه أمامه على المكتب وهو يقول محدثا نفسه: ياترى بتخطط لايه يا كمال؟

عودة الماضي

دخل وليد مكتب أخية الذي كان يجلس على كرسية يطالع بعض الاوراق, فلفت وليد انتباهه مازحا: مش محتاج أي مساعدة ولا قررت انك خلاص هتستغنى عن خدماتي؟ 1

فهب يوسف واقفا مظهرا مدى سعادته برؤية أخيه الصغير وتقدم نحوه يدفعه الشوق والحنين فاتحا ذراعيه: وليد بيه, مش معقول؟! وحشتني يا غالي .

فبادل له وليد العناق وقد كان بالفعل يشفق الى حزن أخيه كثيرا ولكنه فضل العتاب بلهجة مرحة وهو يدفعه بعيدا عنه بلطف: يا عم او عى كدة. دة انت حتى ما كلفتش خاطر وك اتصلت تسأل عليا ولو مرة واحدة .

ظهرت الجدية على وجه يوسف ولكنها كانت مبطنة بروح الفكاهة: معلىش بقا يا صاحبي أصلي خفت ع الرصيد وانت عارف بقا اخوك كارت مش خط .

وليد محذرا: يوسف! انت هتعملهم عليا ولا ايه؟ انا بتكلم بجد .

يوسف: اتصل ببيك فين يابني؟ انت نسيت؟ انت عريس واكيد ما كنتش فاضي للكلام دة. دة غير مراتك اللي ممكن ساعتها تخليك تتبرى مني, الا قولي صحيح , هي عاملة ايه؟

ثم غمز له بنظرة خاصة وهو يدفعه بكتفه قليلا: وانت عامل ايه معاها؟

ورغم انه كان قد أعد بعض الردود الخاصة لتلك الاسئلة الا انه شعر ببعض التوتر في صوته وهو يجيب: الحمد لله, احنا بخير .

وبالطبع فهو يستطيع أن يخدع الجميع بابتسامته الكاذبة وسعادته الزائفة إلا شخصا واحدا وهو يوسف جلال الذي لم تنطلي عليه تلك الحيلة, ولكنه قرر ألا يتدخل في الأمر الا اذا طلب منه ذلك. فألقى نظرة سريعة الى ساعة يده, واكتسى وجهه بالجدية وهو يقول بصوت أراده أن يكون صارما: طيب قولي بقا انت ايه اللي اخرك؟ ولا الجواز علمك الكسل؟

وليد وهو يمسك بيد أخيه ليجلسه بجواره: طب تعالى بس اقعد عشان انا عاوزة اكلمك في موضوع مهم .

يوسف وهو يجلس بجوار أخيه: دة انت مش جاي عشان الشغل بقا .

وليد: ما هو الموضوع اللي انا هكلمك فيه دة هو موضوع شغل بردو .

يوسف مازحا: شكلك كدة عاوز زيادة في المرتب طبعا بقا يا سيدي مانت بقيت رب اسرة. ع العموم اطمن انا عملت حساب الموضوع دة .

وليد جادا: لا يا يوسف, انا كنت عاوز أستقيل من الشغل .

يوسف مندهشا: تستقيل! ازاي يعني؟ طب ليه؟

وليد: مانا يا عم يوسف مش هفضل حابس نفسي في وظيفة ومرتب طول العمر .

يوسف: مانت اللي كنت عاوز كدة. مانا ياما عرضت عليك تمسك معايا الادارة وانت كنت دايمما بترفض. ع العموم احنا لسة فيها, والشركة شركتك زي ما هي شركتي ودة حقك يابني .

حليف جديد وعدو آخر

كان يوسف يجلس على الأريكة في قاعة الاستقبال بفيلته وبجواره زوجته مريم وبصحبتها عمته هادية وابنتها, فقال يوسف بلهجة ودودة: ودي محتاجة سؤال بردو يا عمتي؟ أكيد يعني هدى تقدر تشرفنا في أي وقت ولحد ماهي ما تحب .

هادية : والله يا ولدي أنا ما كنت هوافج أبدا على اكدة لولا الظروف .

يوسف معاتبا برقة: ليه بس يا عمتي؟ وهي هتقعد عند حد غريب؟ مانا بردو في الاول وفي الاخر ابن خالها وهدى طول عمرها زي أختي الصغيرة, ولا ايه؟

ثم نظر الى هدى وسألها بابتسامة ودودة: قوليلي بقا يا هدى انتي قبلتي في كلية ايه؟

هدى باندفاع وهي تقول بشيء من الغرور: قبلت في الكلية اللي انا اخترتها. كلية إعلام .

مريم باندهاش قليل: واشمعنى يعني اعلام؟

هدى بنظرة تحدي: وليه يعني مش اعلام؟ ولا اللي دخلوا اعلام يعني بيقوا احسن مننا؟

فهمت مريم الام تشير تلك الفتاة فتداركت الأمر سريعا وهي تقول بابتسامة دافئة محاولة امتصاص غضبها: لا طبعا يا حبيبتي, دة انا حتى متوقعالك من دلوقت انك هتبقى اعلامية شاطرة وزى القمر .

فردت هدى على ابتسامتها بابتسامة باردة وتقول بلهجة مقتطبة: متشكرة .

وهنا قال يوسف محاولا تلطيف الجو قليلا محدثا زوجته: طب لو سمحتي يا مريم, قولي لام ابراهيم تجهزنا العشا .

احتجت هادية برفق وهي تتنأب: يجعل بيتك عمران بكل خير يا ولدي, بس انا مليش نفس واصل وكمان مجرداش أجدد اكثر من اكدة, عن انكم بجا انا رايحة انعس في اوضتي عشان اجدر اجوم الصبح بكبير وأعود على البلد .

وبالفعل نهضت هادية لتتوجه الى حجرتها وكذلك فعلت ابنتها, فقال يوسف وهو يقترب منها: بس معقول هتمشي بسرعة كدة؟ طب ما تخليكي قاعدة معانا يومين او ثلاثة كمان .

هادية: مانت خابر يا ولدي اني ما برتاحش غير في بيتي .

يوسف موافقا: خلاص اللي تشوفيه .

هادية وهي تضع يدها على كتفه في حنان: مش هوصيك عاد على بت عمك. دي امانة في رجبك يا ولدي .

يوسف مطمئنا: ما تخافيش يا عمتي, هدى في عينيا الاتنين .

هادية: تسلم عيونك يا ولدي. ياللا تصبحوا على خير بجا .

مريم ويوسف: وانتى من اهل الخير .

وصعدت هادية الدرج ويرفقتها ابنتها هدى, ثم نظر يوسف الى زوجته التي جلست مكانها مرة أخرى, فقال لها باقتطاب:
طيب انا هدخل المكتب عشان عندي شغل لازم اخلصه .

مريم: اوك, طيب تحب أعملك حاجة تشربها؟

يوسف: ياريت فنجان قهوة .

لم أعد طفلة

ماهر بصوت حاد: يعني اللي سمعته كويس يا علياء, انا مش هشترك معاكم في اللعبة دي .

فقال علياء ساخرة وقد كانت تجلس على الاريقة بكل استرخاء: ودة من امتى بقا يا سي ماهر؟ مانت كنت أول واحد نفسك
تزيح يوسف جلال دة من ادمك عشان يحلاك الجو مع حبيبة القلب .

ماهر: اولاً مريم لا هي حبيبة القلب ولا حاجة, وثانياً بقا انا فعلاً كان نفسي اخلص من يوسف جلال بأي طريقة, لكن دلوقت
لا .

علياء: وممكن اعرف بقا ايه اللي جد خلاك تغير رأيك بالسرعة دي؟

فقال ماهر بنبرة صادقة: لاني لحد امبارح بس ما كنتش اعرفه على حقيقته, بس لما قربت منه اكثر واتعاملت معاه وجها
لوجه عرفت هو اد ايه انسان يستحق كل تقدير واعجاب وما يستاهلش اننا نأذيه .

علياء بلهجة غاضبة: يعني دة اخر كلام عندك يا ماهر؟

ماهر: ابوة يا علياء دة اخر كلام عندي. مش بس كدة, دة انا كمان لو عرفت انكم نفذتوا اي حاجة من اللي بتفكروا فيها
ساعتها بقا ههد المعبد ع اللي فيه وهعترف بكل حاجة .

اثارت جملته الاخيرة حنق علياء التي نهضت لتقف بجانبه وتضع يدها على كتفه وتقول له بصوت يشبه الفحيح: وماله يا بابا,
بس احب اقولك ان اللي ممكن يشيل الليلة دي كلها في الاول وفي الاخر هو حضرتك يعني أول طوبة هتقع من المعبد اللي
ناوي تهده هتنزل على راسك انت. فاعقل كدة بقا يا امور, وخلينا ماشيين زي ما حنا .

ساد الصمت الثقيل بعد ذلك التهديد الصريح من علياء, اما ماهر فقد أصبحت ملامحه واجمة وفي حيرة من أمره بين أن
يحافظ على نفسه من السجن وربما القتل وبين ان يشارك في أذية يوسف جلال ذلك الرجل الذي أصبح مدينا له بالكثير .

بعد أن وضعت حياة كوبا من النسكافيه كان قد طلبه منها وليد منذ قليل أمامه على المكتب وسمعته يوجه اليها كلمة شكر
مقتطبة, ولكنها وقفت مرتبكة تنظر اليه في حيرة من امرها لا تدري اترحل أم تفتاحه في ذلك الموضوع الان ؟ ولكن عندما
لاحظت انه مشغول كثيراً بتدوين بعض الملاحظات الخاصة بمشروعه حتى بدا انه لم يلاحظ بقائها معه في غرفة المكتب
قررت أخيراً ان الوقت غير مناسب , لذا همت بالمغادرة إلا ان صوته أوقفها: حياة !

تجمدت حياة في مكانها ونظرت اليه لتقول بلهفة: خير يا وليد؟ عايز حاجة؟

وليد وقد رفع عينيه اليها بتساؤل: انتي اللي عايزة حاجة؟ ادلك خمس دقائق واقفة مكانك زي ما تكوني عاوزة تقولي حاجة بس مترددة .

حياة وقد شعرت بحرج شديد: انا اسفة, شكلي عطلتك, انا همشي بقا واسيبك تكمل شغلك .

استوقفها صوته مرة أخرح قبل ان تندفع خارج الحجرة: لسة ما قولتليش كنتي عاوزة ايه؟
عشيقه أخرى

زارت علياء مكتب يوسف في شركته, وقالت له وهي تجلس على الكرسي امام المكتب وقد بدت على وجهها تعبيرات القلق والاهتمام الحقيقي وهي تقول: ولا يهملك يا يوسف, انت لما اتصلت بيا واعتذرتلي وقولت انك مش هتيجي الحفلة, حسيت ان صوتك متغير وكانك زعلان, عشان كدة جيت اطمن عليك, وشكلي كدة اللي حسبته لقيته, مالك يا يوسف؟

فقال يوسف بابتسامة بسيطة محاولا بها اخفاء الحزن الذي يعتمر قلبه: مفيش يا علياء, كل الحكاية ان عندي شغل كثير اليومين دول مخليني متوتر شوية .

وبالطبع لم تصدق علياء ما يقول فشككت في كلامه وهي ترمقه بنظرات متفحصة: شغل ايه يا يوسف اللي يعمل فيك كدة؟ انت مش شايف انت اتغيرت ازاي؟ مش انت خالص يوسف اللي كان معايا من يومين والسعادة بتظل من عينيه .

ثم امالت نحوه قليلا واستطردت: هو فيه حاجة حصلت بينك وبين مراتك؟ زعلتوا مع بعض يعني؟

يوسف: انتي ليه بنقولي كدة؟

علياء: لان بخبرتي بالناس عموما وبيك انت شخصيا اقدر اقول ان السبب اللي كان مخليك فرحان من يومين هو نفس السبب اللي مزعلك دلوقت .

ارتسمت على شفتي يوسف ابتسامة مندهشة من فطنة صديقه .

علياء: افهم من ابتسامتك دي ان انا كلامي مضبوط, وان فعلا فيه مشكلة بينك وبين مراتك, شوف يا يوسف انا مش عاوزة اتدخل في حياتك الشخصية, بس في نفس الوقت مش مستحيلة اشوفك كدة وافضل ساكتة, يا يوسف انا ست واقدر افهم مريم ومشاعرها اكثر منك, فمممكن تقولي ايه اللي حصل؟ ومين عارف؟ مش جايز تلاقي عندي الحل؟ 1

خدعه كلامها الذي لا يستطيع ان يشك أحد في صدقه, وبما انه بالفعل كان في حاجة للتحدث الى شخص ما اي كانت هويته, لذا فقد أخبرها بما حدث بينه وبين مريم, وبعد ان انتهى رأى ابتسامة تعلو وجهها وسمعها تقول وفي صوتها نبرة سخرية: معقول! انت بتغير يا يوسف؟

يوسف: وليه لا؟ هي مش مراتي بردو ومن حقي اني اغير عليها؟

علياء: اه طبعا من حقك, بس مش يوسف جلال يعني هو اللي يدخل في منافسة مع حد .

فقال يوسف ثائرا: منافسة ايه يا علياء؟ ومين دة اللي ممكن ينافسني؟ كل الموضوع اني متضايق شوية لانها دايمتا بتحب تخالف اوامرني .

علياء: مانت لازم كمان تراعي انها مش واخدة ع الكلام دة, ومش لازم يكون كلامك ليها على طول كله اوامر, جرى ايه يا يوسف؟ هو انا بردو اللي هقولك تعامل مراتك ازاي؟

يوسف: مش عارف يا علياء, هي دايمتا بتستفدني وبتخليني اخرج عن شعوري .

علياء: لا يا يوسف, دة انت لازم تبقا اهدى من كدة معاها, ما تنساش انها لسة صغيرة واكيد مندفعة شوية, ودورك انت بقا تمتص غضبها واندفاعها دة بالمسايسة يا يوسف .

مزيدا من الألام

لم تعلم على من يمكنها أن تلقي باللوم؟ فهل ستلوم الظروف التي دائما ما تعترض طريق سعادتها معه وتبعدهما أميالا كلما حاولا الاقتراب خطوة؟ أم تلوم هؤلاء الأشخاص الذين يظهرون غالبا من العدم ليعكرون صفو حياتهما؟ أم تلومه هو ذلك الشخص ذو الماضي الذي لا تستطيع أن تتقبله بكل مساوئه؟ أم انها توجه اللوم الى نفسها لأنها تعلقت بالشخص غير المناسب, رجل لا يمكنه ان يسلم قلبه بسهولة لأي امرأة حتى وإن كانت زوجته؟ هكذا قضت مريم ليلتها يجافئها النوم وهي تفكر في حل مناسب لمشاكلها التي تبدو معقدة جدا عندما يكون يوسف جلال طرفا فيها وتتساءل ما إذا كان هو الآخر يشغل نفسه بتلك الأمور؟ ويريد لعلاقتهما النجاح أم أنها هي البلهاء الوحيدة التي تسعى وراء السراب؟

أقيم حفل افتتاح شركة My Life للمعمار الخاصة بوليد جلال في الفيلا كما كان متفقا عليه من قبل, وقد أعدت كل من مريم و حياة لهذا الحفل بكل دقة وترتيب حيث أخرجناه في أكمل صورة. كان كل من وليد ويوسف يقومان بدور المضيف وقد تلقى وليد الكثير من التهانيء والمباركات, ويوسف كذلك حيث كان البعض يعتقد ان تلك الشركة ما هي الا فرعا جديدا لشركة المعمار الأم وهذا باضبط ما كان يريده يوسف لأن اسم شركة المعمار سيضيف الكثير لأخيه في بداية طريقه. وكان الضيوف يتجمعون في حلقات حول بركة السباحة وكل منهم يتناقش مع الاخر فيما يتعلق بالعمل والصفقات المختلفة, فكعادة رجال الأعمال دائما يتصيدون كل فرصة مهما كانت صغيرة في القيام ببعض الأعمال التي تعود عليهم بالمزيد من الأرباح حتى في المناسبات الاجتماعية, فما بالك باحتفال أقيم خصيصا لهذا الغرض؟

كان الاخوان هما نجمي الحفل بوسامتهم وجاذبيتهم وكذلك ذكائهم في التعامل ولباقتهم في الحديث ينتقلان من حلقة إلى أخرى, ويقوم يوسف بتقديم أخيه إلى جميع رجال الأعمال والمهندسين مع كلمات المدح والإطراء التي لم يجد صعوبة في العثور عليها ليذكي بها شقيقه بل لنقل ابنه الكبير كما كان يعتبره .

ورغم غرابة الأجواء بالنسبة لكل من مريم و حياة الا انهما قد استطاعتا اثبات كفاتهما في ذلك المجال وقد تعرفنا خلال وقت قصير جدا على معظم الزوجات اللاتي حضرن الحفل وقد كانت النساء تعجبين من لباقتهما وحسن ضيافتهما رغم صغر سنهما ويجذبهن حجابهما الجميل والأنيق والذي كانت تفتقر اليه الباقيات .

وفي الوقت الذي كانت تقف فيه حياة ومريم مع بعض النساء يتحدثون في بعض أمور ربات البيوت التي لم تكن تشغل فكر تلك الأخيرة كثيرا لانهما كانت بعيدة كل البعد عن تلك الصفة, جذب انتباه مريم تلك المرأة التي اقتحمت فجأة الحلقة التي كان بها زوجها, هذه المرأة التي تتذكر جيدا مدى أنوثتها وجاذبيتها فإنها بالطبع لم تكن سوى علياء! لاحظت مريم من بعيد رغم انها لم تسمع حديثها معهم إلا أن جميع الرجال قد تقبلنها في حلقتهم بكل بساطة وكان ذلك واضحا تماما من تلك الضحكات التي استطاعت سماعها جيدا من مكانها ذلك, لاحظت حياة انشغال صديققتها بأمر ما كما شعرت بتغيير تعابير وجهها فوجهت عينيهما إلى حيث كانت تنظر مريم لتعلم السبب وراء توجههما ذلك, فهمست اليها دون أن يلاحظ أحد بذكائها المعهود: أكيد دي علياء .

أسف

كانت حياة مستلقية على السرير و هي لا تزال غائبة عن الوعي وشعرها مبعثرا بشكل عشوائي على الوسادة ومريم تجلس بجانبها وفي يدها زجاجة عطر صغيرة وقطعة قطن تحاول أن تقربها من أنف حياة التي بدأت تحرك رأسها يمينا وشمالا وهي تستعيد وعيها تدريجيا إلى أن فتحت عينيها, فابتسمت مريم وهي تحمد ربها ووضعته ما بيدها على المنضدة الصغير التي بجوار السرير وقالت لحياة وهي تمسح على رأسها بحنان: حمدالله على سلامتك يا حياة, فلقطينا عليكى .

فحاولت حياة النهوض وهي تشعر بالوهن وساعدتها مريم إلى أن استطاعت الجلوس وهي تستند برأسها على الوسادة بالخلف, وضغطت على يد مريم والدموع تتجمع بعينيها وتسالها بتوسل: أنا كنت بحلم يا مريم, مش كدة؟ بالله عليك لتقوليلي ان كل دة كان مجرد كابوس .

كانت مريم تتمنى أن تؤكد كلامها إلا أنها لم تستطع فنظرت إليها بعيون مليئة بالشفقة وهي تقول: للأسف يا حياة كان حقيقة, عماد شاكر عز الدين كان موجود هنا ولسة ماشي دلوقت وجوزك نزل يوصله بعد ما اتأكد انك بخير وكمان عشان يجيب حاجة من الصيدلية نفوذك بيها .

وما ان سمعت حياة ذلك حتى انهارت تماما وأخذت تلم وجهها بيديها وتبكي بحرقة وتنفوه بكلام غير مفهوم استطاعت مريم أن تتبين منه القليل بصعوبة حيث كانت تندب حظها: ليه بس كدة يا ربي؟ بعد ما كنت بدأت أنسى؟ بعد ما كنت بدأت أعيش حياتي؟ هو أنا مش مكتوبلي أفرح بقا؟

فجذبته مريم إلى حضنها وهي تبكي ألبكائها و تقول لها مواسية: اهدي يا حياة واستغفري ربنا .

وبالفعل بدأت حياة تردد الاستغفار إلى أن شعرت بها مريم تهدأ قليلا فأبعدتها عنها برفق وأخذت تحفف لها دموعها وهي تقول لها محاولة التفكير بعقلانية: حبيبي احنا لازم نشوف دلوقت احنا هنعمل ايه في المصيبة دي؟

وكانها بسؤالها ذلك أثارت دموعها من جديد, فقالت وهي تنتحب: مش عارفة, مش عارفة يا مريم, ياربي بقا من بين كل الناس يطلع دة صاحب جوزي, الانسان اللي دبحني؟

فحذرتها مريم وهي تضع اصبعها على فمها: هسسسس,وطي صوتك عشان يوسف برة وممكن يسمعنا .

حياة: طب قوليلي انتي يا مريم, اعمل ايه؟ وأتصرف ازاى؟

مريم: مفيش غير حل واحد. انتي لازم تقولي لوليد لأن هو الوحيد اللي هيقدر يتصرف في الموضوع دة, واهو كدة كدة عارف كل الحقيقة ومش فاضل غير انه يعرف اسم الشخص دة وبس .

فقالت حياة ترجوها وهي تحتضن يدها بتوسل: لا يا مريم, بالله عليك بلاش وليد, عشان خاطري يا مريم وليد لا, وليد عصبي ودمه حامي ولو عرف ممكن يقتله, ومحدث عارف الزفت اللي اسمه عماد دة ممكن يعمل ايه؟ دة واطي وندل وممكن يأذيه, وفي الحالتين هخسر وليد .

بين برائن الثعلب

كانت تلك هي إحدى المرات القلائل التي يخرج فيها عبدالرؤف الكامل عن هدوئه وهو يقول والغضب يتأجج في عينيه و يقف مستندا على عكازه: وهو احنا من امتي يا يوسف وعندنا بنات بتتطلق؟

كان يوسف يجلس أمامه في حالة من السكينة والاستسلام كما لم يره عبدالرؤف من قبل وهو يرد بصوت يسمعه بالكاد كل من عبدالرؤف و ابنته وردة التي كانت تجلس على كرسي في مواجهة يوسف حزينه على مصير ابنة أخيها من جهة وقلقته على والدها من الانفعال الزائد الذي حذره منه الأطباء من جهة أخرى: مريم مصررة وما مش هينفع اني أجبرها انها تعيش معايا غصب عنها أكثر من كدة .

فانفعل عبدالرؤف أكثر وهو يقول: يعني ايه مصررة؟ وانت اصلا من امتي وانت بيهمك رأي حد تاني؟ جرى ايه يا يوسف؟ هو اي ست بتطلب الطلاق من جوزها ببيطلقها؟ بالشكل دة ما كنتش فيه أي جواز استمر لحد دلوقت .

يوسف: بس المرادي مختلفة, وصعب اوي ان مريم تتراجع عن قرارها .

عبدالرؤف بشك: ليه يعني؟ وهو حصل ايه بينكم لكل دة؟

وعندما لم يثلث أي رد من يوسف لم يصر على سؤاله بل قال وقد خرج صوته رزينا: ع العموم خلاص, وكويس انك ما اتسرعش وطلقتها قبل ما تيجو, فسيبها قاعدة معانا شوية لحد ما تهدي وبعدين هيبقا لنا كلام ثاني .

يوسف: اللي تشوفه .

ثم نهض مستعدا للرحيل: طيب عن اذنكم .

عبدالرءوف: مع السلامة

وبالفعل رحل يوسف, فنظر عبدالرءوف الى ابنته يسألها باهتمام: هي مريم لسة صاحبة؟

وردة بنبرة حزينة: انا سيبتها كانت لسة صاحبة ويا حبة عيني وشها بقا زي الليمونة من كتر العياط ورافضة انها تتكلم مع أي حد .

عبدالرءوف: طيب انا طالعلها .

فنهضت وردة عارضة مساعدتها: طيب تحب أطلع معاك يا بابا؟

عبدالرءوف رافضا: لا , خليكى انتي, انا عاوز اتكلم ماعها لوحدا, ولما نشوف أخره العنادة ايه؟ 1

جلست وهي تضع وجهها بين ركبتيها وقد جفت دموعها من كثرت البكاء, كانت مريم في حجرتها القديمة بفيللا عبدالرءوف الكامل التي لم تكن تتخيل أنها ستعود إليها بتلك السرعة بعد ثلاثة شهور فقط من زواجها الذي رغم تنبؤها بفشله منذ البداية إلا أنها لم تكن تتوقع له تلك النهاية, كانت مريم تستعيد في ذاكرتها كل ما سمعته من يوسف في لقائهما الأخير وكلمة آسف التي ردها على مسامعها وقد جرحتها أكثر من أن تداويها على عكس ما كان يظن, ثم أخذت تفكر ما الذي جعله يتغير إلى هذا الحد بين ليلة وضحاها؟ وكان الجواب في كلمات علياء التي كانت قد حذرتها منه, فهل ما حدث يعني بأنها كانت على حق؟ وأن يوسف قد اعتذر منها فقط لأنه لم يرد لعلاقتهما أن تتطور إلى تلك الدرجة التي يصعب عندها الانفصال؟ هل كان هذا سبب اعتذاره لها؟

طرف ثالث

كانت هدى تجش بالبكاء وهي تجلس في قاعة الجلوس بفيللا عبدالرءوف الكامل على الأريكة بجوار مريم وتضع رأسها في حضنها ومريم تعمل على طمأننتها وتربت على كتفيها ورأسها وهي تلقي على سمعها بعض الكلمات المواسية على مرأى من ماهر الذي جلس على كرسي آخر بالقرب منهما وهو يتابع المشهد الذي أمامه بعيون جامدة ويبدو عليه السخط الشديد: اهدى يا هدى أرجوكي. خلاص يا حبيبتي كل حاجة انتهت وانتي دلوقتي في أمان وسطينا, انا مش عارفة بس ايه اللي كان وداكي عنده؟ كان فين عقلك وقتها؟

فقالت هدى وهي تبتعد قليلا عن حضن مريم وتقول وقد اختنق صوتها من البكاء: والله يا مريم ما كنت اعرف, والله ماكنت اعرف انه كدة, هو قالي انه عاوز يفرجني على شفته عشان اشوف اللي مش عاجبني فيها ويغيره عشان دي الشقة اللي هنتجوز فيها .

وبنظرة سريعة ناحية ماهر أدركت أنه يحاول بقدر استطاعته أن يحافظ هدونه حيث قد ضاعفت كلمات هدى من غضبه و احتضنت مريم بكفيها وجه هدى وهي تقول لها برقة: خلاص يا حبيبتي, دي كانت تجربة وعدت ولازم تنسيها .

فقالت هدى وقد ازداد نحيبها: انساها ازاي؟ انساها ازاي يا مريم؟ ودي حاجة تنتسي؟

هدى مؤكدة: هنتنسي يا هدى, صدقيني هنتنسي .

وفجأة سمعا جرس الباب بالفيللا وما هي الا لحظات قلائل حتى دخل كل من يوسف و وليد و حياة القاعة كالعاصفة وعلى الفور ألما بالمشهد أمامهما وكان يوسف أول من تحدث وهو لم يفك عليه رؤيته لهدى وهي تكفكف دموعها سريعا وتلك العينين الحمراءين من شدة البكاء فسأل وقد اكتست نبرته بلهجة غاضبة: انا عاوز أعرف ايه اللي بيحصل هنا بالظبط؟

كانت تلك المرة الأولى التي تراه فيها مريم بعد انفصالهما فشعرت بأنها لن تحتل هذا الموقف وأنها لن تقوى على الكلام, ومع ذلك هي التي تولت الرد على سؤاله بكل ما تستطيع من هدوء: مفيش حاجة بتحصل, كل المسألة اني وحشت هدى فجأت عشان تزورني واتأخرت شوية ونسيت انها تتصل بيكم فلما قالتلي اتصلت بحياة عشان ابليها .

بالطبع لم يقتنع يوسف بكلامها فهو يعلم بأن ابنة عمته لم تكن في يوم من الأيام على وفاق مع زوجته, كما أن دموعها تلك قد جعلته يشعر وكأنها تعرضت لكارثة ما, فهو يعلم تمام العلم أن هدى قلما تبكي, لذلك كان سؤاله التالي لهدى: بتعطي لي يا هدى؟ ايه اللي حصل؟

بالطبع لم تجد هدى الرد المناسب على سؤاله فأخذت تنظر الى مريم في قلق تطلب منها العون وقد حدثت. فقالت مريم على الفور وهي تختلق كذبة جديدة: اصل حصل مشكلة في الكلية بينها وبين دكتور عشان كدة هي خايفة من انه ممكن يستقصدها ودي اول سنة ليها .

يوسف بشك: واسمه ايه الدكتور دة وانا هروحله واحل معاه الموضوع؟

بدت مريم في ذلك الوقت وكأنها لم تبرع في شيء الا الكذب حيث استمرت في اختلاق كذبة جديدة: وعلى ايه تعطل نفسك يعني؟ الموضوع مش مستاهل, انا و حياة هنروح معاها بكره ان شاء الله وهنكلمه واهي حياة تعرفه لانه كان بيديها .

رصاصه في الصدر

في حفل الافتتاح الذي اقيم بفيللا عبدالرءوف الكامل والذي أشرف على إعداده كل من ماهر ومريم, وكما أخبر ماهر علياء وعماد فهو بالفعل الذي تولى بدعوة الضيوف لأن علاقاته الاجتماعية كثيرة ومتشعبة بحكم عمله مع عبدالرءوف الكامل من جهة ومع والده من جهة أخرى, وقد كان الحفل شبه مكتمل وقام ماهر بتقديم مريم إلى العديد من سيدات الأعمال وكذلك زوجات رجال الأعمال الكثيرين, كانت مريم تبدو سعيدة بذلك التغيير الذي طرأ على حياتها والذي بدأ ينسبها إلى حد كبير بعض همومها .

أما خارج الفيلا فنجد علياء تجلس في سيارتها التي قد ركنتها أمام الفيلا منذ ما يقرب من ربع الساعة ولكنها لم تبد أي استعدادا لمغادرتها حتى أنها لم تطفئ محركها وكأنها تنتظر شيئا ما, إلى أن جاءت اللحظة التي تنتظرها حيث تراءت لها في مرآة السيارة الخلفية سيارة القادمة نحوها وقد اختارت ذلك الوقت بالذات لتطفئ المحرك وتخرج من السيارة بكل ثقة وهدوء وكان يوسف قد أوقف سيارته بالقرب منها, ثم ترجل منها وحيها بابتسامته الساحرة, فأبدت علياء بعض الدهشة لرؤيته وسألته: معقول يا يوسف انت لسة جاي؟ دة انا افكرت انك جوة مع مراتك من بداية الحفلة .

يوسف: لا يا ستي, انتي النهاردة ممكن تعتبريني ضيف عادي زيي زيك بالظبط .

علياء وقد رسمت على وجهها علامات الحيرة وعدم استيعاب ما يقول: ازاي دة؟

يوسف وهو يتجنب الدخول في تفاصيل: يعني, اصل حصل بين وبين مريم تاتش كدة فخلاها تسبب البيت وتيجي تقعد عند جدتها .

علياء: بقا عشان كدة هي عملت الحفلة هنا؟ انا بردو استغربت لما الدعوة جاتلي ومكتوب عليها فيلا عبدالرءوف الكامل, طيب تحب اتدخل؟

يوسف شاكرا اياها بلطف: لا بلاش. المهم هو فين يوسف خطيبك؟

علياء متصنعة الحزن: ما رزيش بيحي يا سيدي وعمل فيها زعلان علشان يعني الدعوة كانت موجاهي انا مش ليه هو. وانا كمان ما كنتش هاجي بس قولت انك ممكن تزعل ما كنتش أعرف ان العلاقة بينك وبين مراتك وصلت للدرجادي .

ثم أكملت بدلال وهي تميل نحوه: تسملي بقا ندخل مع بعض وانا ايدي في دراعك. اصل بصراحة مش عاوزة ادخل لوحدي .

فقدم لها يوسف ذراعه وهو يقول مبتسما: يا سلام! وانا أطول؟ ده بيقا شرف ليا. 1

ثم وضعت علياء يدها في ذراعه ليبدو لكل من يراهما كالعاشقين وهذا بالضبط ما كانت تريده علياء عندما أعربت عن طلبها .

وبالفعل دخلا سويا الفيلا حيث كان الحفل في الداخل بالطابق الأرضي, وكانت مريم تجول بين ضيوفها لتلبية طلبات ضيوفها والرد على أسئلتهم حين وقع نظرها على باب الفيلا لتراها متأبطة ذراعه بتملك ونظرات الرضا بادية على وجهه, اذن لم يعد يخامرها الشك في حجم العلاقة التي تربطهما والتي لم تنقطع حتى بزواجه من مريم تلك الزوجة المغفلة التي كانت في يوم ما تمنى النفس بحياة سعيدة ستعيشها معه وإلى الأبد وهي لم يخطر ببالها أن موافقته على الزواج منها لم يكن الا لتيقنه بأن مصلحته هي التي كانت وراء ذلك الزواج الذي لم يدم لأكثر من ثلاثة شهور وها هو الآن يعود لماضيه مرة أخرى, ومن يعلم ما ينويه الآن؟ فهل يرغب في أن يتزوجها؟ أم أنه قد تزوجها بالفعل؟ فدخوله معها في ذلك الوضع الحميمي في حفلة هي التي أقامتها لا يفسر الا بتلك الطريقة, حسنا فلقد اختار طريقه وعليها هي أيضا أن تختار طريقها بعيدا عنه .

معك وللأبد

إذا فارقك حبيب باختياره, عندها تشعر بالمعنى الحقيقي لمفارقة الروح للجسد وعندها تفعل كل ما بوسعك حتى تلغي هذا القرار أو على الأقل تعمل على تأجيل لحظة الفراق, ولكن ماذا إن كان هذا الفراق ليس إختيارا؟ ماذا إن فرض عليكم هذا الفراق ما هو أقوى منك ومنه؟

الموت هو عدو كل المحبين ومحب كل الأعداء, فماذا إن كان الموت هو الذي فرض عليكم الفراق؟ هل يمكنك أن تتحداه كما تتحدى أقصى الظروف قسوة وصعوبة؟ حتى وإن كنت تمتلك القوة الكافية لخوض هذا التحدي فما الفائدة وأنت على يقين بأنك ستكون الخاسر لا محالة؟ !

إن أيها الحبيب فهذه رسالتي إليك أدعوك فيها إلى الاستسلام لقلبك ولو لمرة واحدة دعه يحركك, فلم يعد لدينا المزيد من الوقت لذلك الجفاء الذي أصبح يقتلني, و أنا أمامك الآن أتنازل عن كبريائي وأعترف لك بحبي وبأنه لا يمكنني أن أعيش بدونك لحظات إضافية, حقا لا يمكنني ذلك. وسأكررها دائما وأمام العالم أجمع الذي لم يعد يهمني فيه أحد سواك. وها أنا أقف في انتظار اعترافك .

كانت مريم تقف في المحل تعلق بعض الثياب على الحاملة عندما جاءها صوت من الخلف يقول: مساء الخير .

فالتفتت مريم لترى خالد صلاح يقف أمامها وبجانبه أخته ليلي تلك الفتاة الهادئة والابتسامة التي لا تغادر وجهها فقالت مريم مرحبة: اهلا أستاذ خالد .

ثم صافحت ليلي بحرارة وهي تقول وقد اتفقتا على رفع الألقاب بينهما: عاملة ايه يا ليلي؟ وحشتيني .

ليلى بصدق: انتي أكثر والله يا مريم, المحل جميل جدا, ربنا يباركك فيه. حقيقي خالد كان عنده حق لما وصاني أشترى فستان خطوبتي من هنا .

مريم: تسلمي يارب كلك ذوق, بس ايه ده؟ انتي اتخطيتي ولا ايه؟

ليلى: اه يا حبيبتني, قرينا الفاتحة, وان شاء الله الخطوبة الاسبوع الجاي .

مريم: ايه دة بجد؟

ثم حضنتها بسعادة وهي تقول: ألف مبروك يا حبيبتى , وربنا يتملك بخير .

ليلى: الله يبارك فيكى يا قمر .

ثم أكملت بمزاح وهي تغمز لأخيها: مانا قولت بقا كفاية كدة. خالد هيعنس بسببى, اصله ما كنش راضى يتجوز الا لما يطمئن على مستقبلي الأول, فأنا قولت بقا أكسب فيه ثواب وأوافق .

فردت مريم على مزاحها بالمثل: والله فيكى الخير, هو فعلا ابن حلال ويستاهل التضحية الكبيرة دي .

وبدا أن ليلى كانت تنتظر تلك الفرصة فاستغلت ما قالته مريم لتؤكد على كلامها وتقول بنبرة خاصة: اه والله يا مريم. هو ابن حلال أوي, ويا بخت اللي تكون من نصيبه.